

Inatsisartut peqqussutissaattut siunnersuummut nassuiaatit

## **Nassuiaatit nalinginnaasut**

### **1. Aallaqqaasiut**

*Siunnersuummut tunuliaqutaasut:*

Siunnersuut ilinniagaqarnersiutit pillugit Inatsisartut peqqussutaannik atuuttumik: ilinniagaqarnersiutit pillugit Inatsisartut peqqussutaannik nr. 3, 2. maj 1996-imeersumik Inatsisartut peqqussutaatigut nr. 12-ikkut 18. december 2003-meersukkut kingullermik allangortinneqarsimasumik, tunngaveqarpoq. Siunnersuut allannguutissatut siunnersuutigineqartut amerlassusiat pissutigalugu paasiuminartuutitsinissarlu anguniarlugu peqqussutip allannguutigisarsimasai katiterlugit peqqussutitut ataatsimoortutut saqqummiunneqarpoq.

Siunnersuutip suliarineqarneranut tunuliaqutaasut tassaanerupput ilinniagaqarnersiutinik iluarsaaqqinneq pillugu nassuiaammi maj 2002-meersumi kaammattuutit. Nassuiaat taanna Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaarfimmit suliarineqarpoq. Nassuiaat Inatsisartut 2002-mi upernaakkut ataatsimiinnerannut atatillugu Inatsisartunut ilisimatitsissutitut saqqummiunneqarpoq. Siunnersuummi § 4-mi, Ilinniagaqarnersiutit suussusii aningaasartaasalu amerlassusii, § 9-mi, innuuniarnermut aningaasartuutit allatigut matussuserneqarneranni ilinniagaqarnersiutit atorunnaarnerat aamma § 30-mi, naammagittaalliornissamat periarfissaq, aalajangersakkat tassaapput nassuiaammi taaneqartumi kaammattuutit nassatarisaat. Allannguutit taakku aningaasanut inatsimmi ilinniagaqarnersiutinut kontunut oqaasertaliussani tapiissutit taarsigassarsiallu il.il aningaasartassaattut siunnersuutigineqartunut nutaanut aamma ilinniagaqarnersiutit pillugit nalunaarummi tassunga atasumi allannguutigitinniarneqartunut atatillugit isigineqassapput.

Aamma nunap ilaani sumiinneq apeqqutaatinnagu ilinniakkamik toqqaasinnaanermut periarfissamik ammaasoqassasoq kissaatigineqarsimavoq. Tamanna siunnersuummi § 1, imm. 4-mi ilanngunneqarsimavoq, tassa misileraalluni aaqquissuussinernut ilaatillugu Naalakkersuisut periarfissalerneqarmata ilinniakkat taakkununnga assingusut Kalaallit Nunaanni ingerlanneqarsinnaannginnerannik piumasaqaatip saneqqunnissaanut.

Kiisalu siunnersuutip suliarineqarneranut tunuliaqutaasoq aamma tassaavoq peqqussutip ataatsimut naleqqussarneqarnissaa, matumani aalajangersakkanik nutaanik, allannguutininik erseqqissaatinillu peqqussutip massakkut atuuttuup aqunneqarneranut atatillugu pisariaqartutut isigineqartunik ilan-ngussineq ilanngullugu eqqarsaatigalugu. Allannguutit taakku § 5-imi, sulisitsisunut l rlingeqartunut tapiissutinut aningaasaleeqataassutit, § 8, imm. 2-mi, najugaqarnissamik piumasaaqat eqqarsaatigalugu atuutsitsinnginerit, § 24-mi, ilinniagaqarnersiutinik nerisaqarnermut ineqarnermullu unerartitsineq, § 27, imm. 2-mi, ilinniagaqarnersiutit pillugit malittarisassanik aqutsinerup Namminersornerullutik Oqartussat ataanni oqartussaasunut allanut suliffeqarfinnullu Ilinniagaqarnersiuteqartitsivimmit allaasunut tunniunneqarnera aamma § 28-mi, ilinniagaqartoq pillugu paasissutissanik pissarsiniarneq ingerlatitseqqinnerlu, allannguutigittinneqarsimapput.

Allannguutissatut siunnersuutigineqartut itisilerneqarnerat eqqarsaatigalugu siunnersuutip pingaarnersutigit imarisai siunnersuummilu aalajangersakkat ataasiakkaat pillugit nassuiaatit innersuussutigineqarput.

*Peqqussutissatut siunnersuummik piareersaanermi pingaarnertit:*

Ilinniagaqarnersiutinik iluarsaaqqinneq pillugu nassuiaat taamanikkut Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisuusup "Ilinniagaqarnersiutinik iluarsaaqqinnermi suliassiissutit" suliarisai tunngavigalugit suliarineqarpoq. Iluarsaaqqinneq ingerlatamik aqqissuussinertut aqqissuunneqarpoq, pisorta qarfiup, Ilinniagaqarnersiutinik Aqutsiviup, Aningaasaqarnermut Pisorta qarfiup kiisalu Kalaallit Nunaanni Danmarkimilu ilinniagaqartut kattuffiisa K.I.K.-p aamma D.K.I.K.-p sinniisaanik ilaasoqartaqartumik aqutsisoqatigiiliorluni. Suliaq taanna nassuiaammik maj 2002-mi naammassineqartumik inaarneqarpoq.

Nassuiaat taanna tamatuma kingornatigit ilinniarfinnut tamanut, Namminersornerullutik Oqartussani pisorta qarfinnut, Danmarkimi Kalaallit Illuutaannut, KANUKOKA-mut ilinniagaqartullu kattuffiitut tusarniaatigalugu nassiunneqarpoq.

Ilinniagaqarnersiutit pillugit Inatsisartut peqqussutaata allanngortinneqarnera pillugu Inatsisartut peqqussutissaattut siunnersuutip Inatsisartut ukiakkut ataatsimiinneranni saqqummiunneqarnissaa sioqqullugu siunnersuut suliami illuatungiusunut susassaqartunut tamanut tusarniaatigineqarsimavoq, matumani ilinniagaqartut kattuffii aamma ilanngullugit eqqarsaatigalugit.

Taamanikkut allannguutissatut siunnersuutaasoq Inatsisartut ukiakkut ataatsimiinneranni 14. oktober 2002-mi siullermeerlugu oqaluuserineqarpoq.

Allannguutissatut siunnersuut Inatsisartut 2002-mi ukiakkut ataatsimiinneranni siullermeerlugu oqaluuserineqartoq aallaavigalugu Inatsisartut 2003-mi ukiakkut ataatsimiinneranni peqqussutissatut katersukkatut siunnersuut nutaaq

Naalakkersuisut saqqummiuppaat. Siunnersuut siullermeerneqarnermi kingornatigut Naalakkersuisunit tunuartinneqarpoq. Tamatumunnga atatillugu ilinniagaqarneriutit pillugit Inatsisartut peqqussutaata allannguutissaatut siunnersuut Naalakkersuisut saqqummiuppaat, siunnersuutip tunuartinneqartup ilaannaanut inuussutissarsiuutit ilinniartitsinerni atuartut praktikkernerannut tapiissutit allanngortiterneqarnerannut tunngasunik imalik. Peqqussutip allannguutaa taanna akuersissutigineqarpoq. Peqqussutip allannguutaa taanna akuerineqarpoq.

Naalakkersuisut siunnersuut, Inatsisartut 2003-mi ukiakkut ataatsimiinneranni siullermeerlugu oqaluuserineqartoq aammalu nalunaarutit, Inatsisartuni tassunga tunngatillugu saqqummiunneqartut tunngavigalugit siunnersuut saqqummiunneqartoq suliaaraat.

Siunnersuummut tassunga sanilliullugu siunnersuummi matumani Naalakkersuisut misileraanermut ilaatillugu sumi najugaqarneq apeqqutaatinnagu ilinniakamik toqqaasinnaanermik: § 1, imm. 4 ammaassinissaannut inatsisitigut tunngavissaq ilanngunneqarpoq.

Aammattaaq sulisitsisunut lertlinginik inuussutissarsiornermi tunngaviusunik ilinniartitsinerni: § 5, imm 1 atorfinitsitsisunut tapiissutit aningaasalersorneqarnerat pillugu aalajangersakkap allanngortinneqarnissaa siunnersuutigineqarsimavoq. Massakkut siunnersuutigineqarpoq aningaasaleqataassutit aningaasanut inatsisikkut aalajangersarneqartassasut.

Taamaattutaaq najugaqarnissamik piunasaqaat: § 8, imm. 2 pillugu aalajangersakkap allanngortinneqarnissaa aamma siunnersuutigineqarpoq. Siunnersuutigineqarpoq ilinniarnermut atatillugu Kalaallit Nunaata avataani najugaqarnerit tamarmik Kalaallit Nunaata avataani najugaqarnertut isigineqassanngitsut. Manna tikillugu ilinniarnermut atatillugu najugaqarnerit kalaallit oqartussaasa peqataanerisut pilersut kisimik pineqarsimagaluarpur.

Aammattaaq naammagittaalliornissamut periarfissamik aalajangersagaq: § 30 allanngortinneqarsimavoq. Naammagittaalliornissamut periarfissap sapaatit akunnerinit sisamanit sapaatit akunerinut arfinilinnut sivitsorneqarnissaa siunnersuutigineqarpoq. Tamatumunnga peqatigitillugu naammagittaalliuuteqarnissamut piffissaliunneqartup aallartiffia ullormit aalajangiinerup tiguneqarfianit ullormut aalajangiiffiusumut allanngortinneqassoq siunnersuutigineqarpoq. Aammattaaq naammagittaalliuuteqarnissamut malittarisassat aalajangersarnissaannut Naalakkersuisunut inatsisitigut tunngavissaq killilerneqarpoq. Siusinnerusukkut siunnersuummi naammagittaalliuuteqarnissamut periarfissap killilerneqarnissaa pillugu malittarisassanik Naalakkersuisut aalajangersaasinnaasimapput, tamannalli siunnersuummi matumani ilanngunneqarsimanani.

Kiisalu ulloq atortuulersitsivik nutaaq siunnersuutigineqarsimavoq, inatsisiliornernilu teknikkikkut annikinnerusunik allanngortitsisoqarsimalluni.

Siunnersuut piffissami 30. april 2004-mit 4. juni 2004-p tungaanut illuatungiusutut tusarniaavigineqartut allattorsimaffianni, ilanngussaq 1, taaneqartunut tusarniaatigineqarsimavoq.

## **2. Siunnersuutip pingaarnerusutigut imarisai pillugit nassuiaat.**

Aallaqqaasiummi taaneqartutut siunnersuut ilaatigut ilinniagaqarnersiutit pillugit Inatsisartut peqqussutaannik atuuttumik ilaatigullu siunnersuummik Inatsisartut 2003-imi ukiakkut ataatsimiinnerani siullermeerlugu oqaluuserineqarsimasumik tunngaveqarpoq.

Peqqussutip maannakkut atuuttup ilusaa atortiinnarneqarpoq, massakkullu kapitaliusut qulequtaat taakkuusut atorlugit ingerlateqqinneqarlutik. Aalajangersakkalli nutaat allannguutillu Inatsisartut peqqussutaata nr. 5-ip 23. maj 2000-imeersup akuerineqarneratigut Inatsisartullu peqqussutaatigut 18. december 2003-meersukkut allannguutaasut kingornatigut allannguutigitinneqartut ilanngunneqarnerisigut paragraffit normulersugaanerat allanngorpoq.

Siunnersuutip imarisaani allannguutit ataasiakkaat saqqummiunneqarneranni allannguutit assigiin-ngitsut pingasut aallaqqaasiummi taaneqartut aallaavigineqassapput, tassalu:

- 1) Ilinniagaqarnersiutinik iluarsaaqqinneq pillugu nassuiaammi kaammattuutitut malitseqartitsineq.
- 2) Sumi najugaqarneq apeqqutaatinnagu ilinniakkanik toqqaanissamik ammaassinissamut periarfissaq.
- 3) Peqqussutip naleqqussarneqarnera.

*I-imut. Ilinniagaqarnersiutinik iluarsaaqqinneq pillugu nassuiaammi kaammattuutitut malitseqartitsineq.*

Ilinniagaqarnersiutinik iluarsaaqqinneq pillugu nassuiaat:

Iluarsaaqqinnermi siunertaasimavoq ilinniagaqarnersiutit pillugit malittarisassanik pisariinnerusunik atuisunullu pitsaanerusunik siunnersuuteqarnissaq, makku isiginiarlugit:

- ilinniagaqartut atugaasa ataatsimut ajorseriartinneqannginnissaat
- malittarisassanik aqutsinerup oqinnerulersinneqarnissaa
- aningaasatigut atugassiissutinik atorluanaanissap qulakkeerneqarnissaa.

Siunnersuutit makkuninnga kissaateqarneq isiginiassavaat:

- amerlanerusut ilinniagaqalernissaat
- amerlanerusut ilinniakkamik imminnut naleqqunnerusumik toqqaasalernissaat
- ilinniagaqartut amerlanerusut ilinniakkaminnik naammassinnittalernissaat,

aammalu

- ilinniagaqartut amerlanerusut Kalaallit Nunaanni sulerusulersinneqarnissaat.

Aammattaaq nassuiaammi kaammattuutini ilinniagaqartut sulinerminni qaffariartornissaminnut akisussaaffimmik pisinnaasaqarnermillu annerusumik tunineqarnissaat aallaavigineqarpoq.

Nassuiaatip eqqikkaanertaani oqaatigineqarpoq ilinniagaqarnerisutit iluarsaaqqinnermik suliaqarnermut sinaakkusiussat ilaatigut suliaassiissutigineqartut aalajangersarneqartukkut aamma 2002-mi aningaasanut inatsisikkut ilinniagaqarnerisutit tunngasuni 2002-mi 5 mio. kr.-nik ukiu-nilu missingersuusiorfiusuni 10 mio. kr.-nik sipaaruteqarnermik imaqtumi aalajangersarneqarsimasut.

Nassuiaammi eqqikkaalluni oqaatigineqarpoq pisariillisaaneq pitsaanerulersitsinerlu kiisalu aaqqissuussinerit ilinniagaqartut ilinniarnermik ingerlaneraniq piareersaanerminni kiisalu aningaasanik imminnut atugassanngortinneqartunik aqutsinerminni annertunerusumik akisussaaffeqarnerannik nassataqartut pilersinneqarnissaat anguniarneqartoq.

Aamma oqaatigineqarpoq nutaamik pilersitsinertut qiortakkamik atuilernissaq siunnersuutigineqartoq, tassa ilinniagaqartut tulleriinneri malillugit piareersaataasumik aamma ingerlariaqqiffiusumik ilinniagaqarnermik naammassinnerannut peqatigitillugu qiugassanik aalajangersimasunik tunineqartassallutik. Oqaatigineqarpoq tamanna aqutsinerup pisariinnerulerneranik nassataqassasoq, ilinnia-gaqartullu ataasiakkaat eqqarsaatigalugit ilinniarnernup ingerlaneraniq piareersaanermut pilersaarusiornermullu akisussaaffimmik annertunerusumik nassataqassalluni. Tamatuma saniatigut ilinnia-garnermi taarsigassarsiarineqarsinnaasut amerlinerisigut tunniunneqartartut arlallit piiarneqarnissaat siunnersuutigineqarpoq.

#### Siunnersuut massakut saqqummiunneqartoq:

Kaammattuutit siunnersuummi massakut saqqummiunneqartumi ilaannakortumik ilanngunneqarsimapput. Qiortakkanik atuilernerip eqqunneqarnissaa § 4, imm. 1-imi siunnersuutigineqarpoq. Taamatut aaqqissuussineq pillugu malittarisassat siunnersuummi § 4, imm. 3 aamma § 11 tunngavigalugit nalunaarutikkut aalajangersarneqassapput.

Immikkut tunniunneqartartut ilaasa peerneqarnerat eqqarsaatigalugu tamanna ilinniagaqarnerisutit pillugit Namminersornerullutik Oqartussat nalunaarutaata nr. 3-p 6. februar 1998-imeersup massakut atuuttup allanngortinneqarneratigut pissaaq.

Tamatumunnga peqatigitillugu taarsigassarsiat tapiissutillu amerlassusiisa allanngortinneqarnissaat anguniarneqarpoq. Taakku konto pingaarnermut 40.13.24, aningaaserivinnit taarsigassarsiaritit aamma 40.13.50, ilinniarnermi tapiissutit

meeqqanullu tapit, oqaasertaliussani takuneqarsinnaapput. Allanguutit taakku Naalakkersuisut 2005-imi aningaasanut inatsisissatut siunnersuutaanni ilaapput.

Qiortakkanik atuilerneqarnerup eqqunneqarnera aamma taarsigassarsiat tapiissutillu amerlassusiisa allanngortinneqarnerat ilinniagaqarnersiutinik iluarsaaqqinnermi tunngavigineqarnerpaajupput.

Allanguutitigut taakkunatigut iluarsaaqqinnermi pingaaruteqartumik tunngaviusut pingaartillugit isiginiarneqarsimapput, tassalu:

- ilinniagaqartut nammineersinnaasuseqarnerisa, ilinniagaqarnerup ingerlaneranut akisussaanerup aamma ilinniagaqarnersiutit aningaasartaannik aqutsinerup siuarsarneqarnissaat.

- ilinniagaqarnersiutinik aqutsinerup pisariillisarneqarnissaa pitsaanerulersinneqarnissaalu.

Aammattaaq periaatsit ilaat uku aallaavigineqarsimapput:

- 1) Immikkut tunniuttakkat tapiissutinut allanngortinneqarnerat.
- 2) Ilinniagaqarnersiutisiaqarnissamut periarfissat pitsanngorsarneqarnerat siullertut pingaarnertul-lu ingerlariaqqiffiusumik ilinniagaqarnerni ilinniagaqartunut iluaqutissanngortinneqassaaq.
- 3) Danmarkimi ilinniagaqartunut immikkut tunniunneqartartut, angallanneqarnernut tapiissutit, taakku kisimik manna tikillugu pisinnaasimasaat, taarserneqassapput.

Immikkut tunniunneqartartut tapiissutinut allanngortinneqarnerat ilaatigut ilinniagaqarnersiutit pillugit malittarisassat aqunneqarnerisa pisariinnerulernissaannik taamalu aqutsinikkut oqilisaanissamik kissaateqarnermik ilaatigullu ilinniagaqartut nammineersinnaannerisa ilinniagaqarnersiutillu aningaasartaannut nammineq akisussaanerup aqutsinerullu siuarsarneqarnissaannik kissaateqarnermik tunngavilersorneqarpoq.

Ilinniagaqarnersiutisiaqarsinnaanermut periarfissat pitsaanerulersinneqarnerisa ilinniagaqartunut ingerlaqqiffiusumik ilinniagaqarnernik ingerlatsisunut siullertut pingaarnertullu iluaqutissanngor-tinneqarnissaat imatut tunngavilersorneqarpoq, tassalu naliliisoqartoq taakku atugassarititaasunik pitsaanerulersitanik pisariaqartitsinerpaajusut, taakku immikkut tunniunneqartartunik assigiinngi-tsunik manna tikillugu pisinnaatitaasimanerannut atatillugu.

Ilinniagaqartunut Danmarkimiittunut immikkut tunniunneqartartut, taakkuinnaat manna tikillugu pisinnaatitaaffiisa atorunnaarsinneqartut pillugit taarsiisoqarnissaannik kissaateqarneq imatut tunngavilersorneqarpoq, tassalu immikkut tunniunneqartartut tapiissutinut allanngortinneqarnerat pissutsinik assigiinngitsunik Danmarkimi ilinniagaqartunut aamma Kalaallit Nunaanni ilinniagaqartunut atuuttunik assigiinngissuteqartunik aallaaveqarnissaasa qulakkeerneqarnissaannik kissaateqarnermik.

Tunngaviit periaatsillu ilaat aallaavigalugit allannguutit makku siunnersuutigineqarput:

- Immikkut tunniunneqartartut peerneqassasut, tapiissutit taarsigassarsiaasinnaasullu qaffanneqar-nerisigut. Taamaattorli juullisioriarlorluni akiliunneqarluni angalaneq, Danmarkimi ilinniagaqartut meeqqanut tapiissutit Danmarkimi atuuttut aamma Danmarkimi iliniagaqartut katsorsartinnerinut aningaasartuutit akilerneqartarnerat atatiinnarneqassapput.

- Ilinniagaqarfinni ingerlariaqqiffiusuni, inuussutissarsiutinik tunngaviusumik ilinniartitsinerit aam-ma ilinniartitsinerit piareersarfiusut Kalaallit Nunaata avataaniittut ilanngunnagit, ilinniagaqartunut tapiissutit malunnaatilimik qaffanneqarput (Kalaallit Nunaanni ilinniagaqartunut 7,1 procent, Danmarkimilu ilinniagaqartunut 9,5 procent).

- Ilinniartitsinerni piareersarfiusuni ilinniarnermillu paasisitsiniaanerup ingerlanerani ilinniaga-qartunut tapiissutit angerlarsimaffimmini najugaqartunut allannguuteqanngillat (qaammammut 2.100 kr.). Ilinniartitsinerni piareersarfiusuni ilinniagaqartut aallaavittut tamarmik angerlarsimaffin-ni najugaqartutut isigineqassapput, ilinniagaqartulli pissutsit immikkut ittut pissutigalugit nammineq inoqutiminnik pilersitsinissamik attassiinnarnissamillu pisariaqartitsisut immikkut akuerineqarnissaannut periarfissaqartitsisoqassalluni. Taakku qaammammut 4.200 kr.-nik angerlarsimaffiup avataani najugaqartut tigusartagaasa amerlaqataannik tigusartagaqassapput.

- Ukiup ataatsip ingerlanerani taarsigassarsiarineqarsinnaasut marloriaatinngortinneqassapput, semesterikkaartumillu tunniunneqartassallutik.

Tapiissutinut taarsigassarsianullu qaffaatinik aningaasalersuineq sinaakkutassiissutaareersut iluanni imatut pissaaq:

- taarsigassarsinissamut periarfissat annikillineqarnerisigut, manna tikillugu siunnersuummut sanilliullugu.

- Kalaallit Nunaanni ilinniagaqartut angerlarsimaffimmi najugaqartutut aallaavittut isigineqassap-put, manna tikillugu siunnersuutaasimasumik ingerlatitseqqinneq.

- FSA-mi aamma FSUA-mi misilitsinnissaq siunertaralugu atuartitsinermut ilinniagaqarnerisutit, manna tikillugu siunnersuutaasimasumik ingerlatitseqqinneq.

§§-it 9-p 30-illu allannguutissaattut siunersuutigineqartut aamma tassapput nassuiaammi kaammattutigineqartut ilanngunneqarneri. § 9, imm. 1-ip, peqqussummi atuuttumi § 7, imm. 1, allanngortinneqarneratigut erseqqissarneqarpoq tassaasut ilinniarnermut tapiissutit meeqqanullu tapiissutit, immikkut tapiissutaanngitsut, ilinniagaqartup pisinnaatitaaffiginngikkai, ilinniagaqartoq tamatuma peqatigisaanik ilinniarnernup nalaani ilinniarnermi akissarsiaqarpat imaluunniit ilinniarnermi pisortatigoortumik allatut aningaasarsiaqarpat, inuuniarnermi aningaasartuutinik matussutissatut siunertaqartunik.

Peqqussummi atuuttumi § 9-p, imm. 2-p, § 7-ip, imm. 2-p  
allanngortinneqarneranni erseqqissarneqarpoq ilinniarnermi tapiissutit  
taakkuinnaasut, ilinniagaqartup pisinnaatitaaffiginngisai, ilinniagaqartoq  
ilinniarnernup nalaani ilinniarnermi akissarsiaqarpat imaluunniit ilinniarnermi ani-  
ngaasarsiaqarpat, inuuniarnermi aningaasartuunik matusissutissatut siunertaqartunik.

§ 30-ip, peqqussummi atuuttumi § 26, allannguutissaatut siunnersuutip  
Ilinniagaqarnersiuteqartitsineri Naammagittaalliuuteqartarfiup  
atorunnaarsinneqarnera nassataraa, tassungalu taarsiullugu Naalakkersuisunut  
naammagittaalliuuteqarnissamut periarfissaqalerluni. Allanguut taanna  
nassuiaammi kaammattuutigineqarsimavoq, naammagittaalliuutit  
Ilinniagaqarnersiuteqartitsineri Naammagittaalliuuteqartarfimmut  
tunniunneqartartut ilinniagaqarnersiutit pillugit malittarisassat inatsisilerinikkut  
qanoq paasineqarnissaannik apeqqutaagajunnerat innersuussutigalugu, tassanilu  
inuinnaat naliliinerat pisariaqartinneqarajunneq ajormat. Aamma oqaatigineqarpoq  
naammagittaalliuutit inatsisilerituinnarnit naliliiffigeqqinneqartarpata  
naammagittaalliuutit pillugit sulianik suliarinninneq eqaannerulersinneqassasoq,  
piffissarlu suliap suliarineqarneranut atorneqartoq sivikinnerulissaqisoq.  
Aammattaaq naammagittaalliornissamut piffissaliussap sapaatit akunnerinit  
sisamanit sapaatit akunnerinut arfinilinnut sivitsorneqarnissaa  
siunnersuutigineqarpoq, tamatumunngalu peqatigitillugu massakkut  
siunnersuutigineqarluni piffissap aallartiffia tassaassasoq ulloq aalaja-ngiiffik,  
manna tikillugu ullormut aalajangiinerup tiguneqarfianut taarsiullugu.  
Allannguummot tassunga tunngavilersuutigineqartoq tassaavoq aalajangiinerup  
qanga tiguneqarfiata uppersarniarnernata ajornakusoorsinnaanera. Ulloq  
aalajangiiffik ullormit aalajangiinerup tiguneqarfianit siulliummat  
piffissaliunneqartup sapaatit akunnerinit sisamanit arfinilinnut sivitsorneqarnissaa  
siunnersuutigineqarpoq.

*2) Nunap ilaani sumiinneq apeqqutaatinnagu ilinniakkamik toqqaanerup  
ammaanneqarnissaanut periarfissaq.*

Taamatut ammaassinissamik kissaateqarneq siunnersuummi § 1, imm. 4-kkut  
piviusunngortinneqarsimavoq. Misileraalluni aaqquissuussinernut ilaatillugu  
ilinniakkap Kalaallit Nunaanni ingerlanneqarsinnaannginneranik aalajangersakkap  
saneqqunneqarnissaanut Naalakkersuisut inatsisitigut tunngavissalerneqarput.

Nunap ilaani sumiluunniit ilinniakkamik sumilluunniit toqqaasinnaalersitsiniarluni  
aalajangersagaq taanna periarfissiivoq ilinniagaqarfiit killiligaasut iluanni nunap  
ilaani sumiinneq apeqqutaatinnagu ilinniakkamik toqqaasarnermi misilittakkanik  
Naalakkersuisut katersinissaannut, taamaalillutik ilinniagaqartut nammineq  
toqqarsinnaalerlugu ilinniagaq Kalaallit Nunaanni Danmarkimiluunniit  
ingerlakkumanerlugu.

*3) Peqqussutip naleqqussarneqarnera.*



Sulisitsisunut inuussutissarsiutinik tunngaviusumik ilinniartitsinerni lęrlingini atorfinitsitsisunut tapiissutit qanoq aningaasalersorneqartarnerat pillugu aalajangersakkap allanngortinneqarnissaa pissusissamisoortut isigineqarsimavoq. Malittarisassat atuuttut malillugit tapiissutit affaat Nu-natta Karsianit affaallu sulisitsisut inuussutissarsiutinik ilinniartitsinermut akileeataassutaat pillugit Inatsisartut inatsisaat tunngavigalugu akiliutigineqartunit aningaasalersorneqarput. Naalackersuisut isumaqarput aningaasaleeqataassutit aningaasanut inatsisikkut aalajangersarneqarnerat eqaanneru-lersitsissasoq, taamaattumillu tamanna siunnersuummi § 5, imm. 1-ikkut siunnersuutigineqarpoq.

Siunnersuummi § 8, imm. 2-kkut allannguutigigitinneqarpoq ilinniagaqarluni Kalaallit Nunaata avataani najugaqarnerit tamarmik Kalaallit Nunaata avataani najugaqarnertut isigineqassanngitsut, ilinniagaqarnersiutisiaqassagaanni Kalaallit Nunaanni aalajangersimasumik najugaqarnissamik § 8, imm. 1-imi piunasaqataasumut sanilliullugu. Allannguut taanna tunngavilersorneqarpoq Naalackersuisut isumaqartut Kalaallit Nunaata avataani ilinniagaqarluni najugaqarnerit inuinnarnit aaqquissuussat pineqartup kingusinnerusukkut ilinniagaqarnersiutisiaqarsinnaatitaaneranut killilersuisuussappata naleqquttuunngitsoq. Allannguut nunap ilaani sumi najugaqarneq apeqqutaatinnagu ilinniakkamik toqqaasinnaanermik ammaassinissamik siunnersuutigineqartumut atatillugu aamma isigineqassaaq.

Siunnersuummi § 24, imm. 1-ikkut aamma 2-kkut peqqussummi atuuttumi § 22, imm- 1-ip allanngortinneqarnissaa siunnersuutigineqarpoq. Nutaatut siunnersuutigineqarpoq ilinniartut najugaqarfii najugaqarfinnilu allani Namminersornerullutik Oqartussat akilersugaanni nerisanut ine-qarnermullu akiliutit Naalackersuisut aamma unerartissinnaassagaat. Allannguummut tassunga tunngavilersuutigineqarpoq ilinniagaqartut Kalaallit Nunaata avataani ilinniagaqartut najugaqarfii najugaqarfinnilu allaani najugaqartut nerisaqarnerat ineqarnerallu Namminersornerullutik Oqartussat ullumikkut aamma akilertaraat, matumani aamma Danmarkip avataaniittut ilanngullugit eqqarsatigalugit. Ilinniartut najugaqarfii taakku Namminersornerullutik Oqartussanit kommuninilluunniit pigineqaratilluunniit ingerlanneqanngillat.

Siunnersuummi § 24, imm. 2-kkut aamma erseqqissarneqarpoq nerisanut ineqarnermullu aki-liutinik unerartitsineq piffissamut ilinniagaqartup akiliunneqarluni nerisaqarfigisaanut ineqarfigisaanullu pisinnaasoq. Erseqqissaaneq taanna aamma piffissani ilinniagaqartup akiliunneqarluni nerisaqarnissamik ineqarnissamillu neqeroorummik atuiumangiffiani unerartitsinissamut inatsisitigut erseqqissumik tunngavissaliiniarnermik tunngavilersorneqarpoq.

Siunnersuummi § 27, imm. 2-kkut nutaatut siunnersuutigineqarpoq ilinniagaqarnersiutit pillugit malittarisassanik aqutsineq Ilinniagarneqarsiteqartitsivimmit Namminersornerullutik Oqartussat ataanni oqartussanut allanut tamakkiisumik ilaannakortumilluunniit Naalackersuisut tunniussinagaat. Aalajangersakkap taassuma tunngavia tassaavoq ilinniagaqarnersiutit pillugit malittarisassat aqunneqarnerisa ullumikkut oqartussanut suliffeqarfinnullu assigiinngitsunut agguataangaatsiareernejarsimanerat.

Taamaalilluni Kultureqarnermut, Ilinniartitaanermut, Ilisimatusarnermut Ilageeqarnermullu Pisorta qarfiup Nuummi Københavnimilu suliassat aalajangersimasut isumagi-sarai. Aamma Kalaallit Nunaanni ilinniarfiit Danmarkimilu Kalaallit Illuutaat taamaaliorput. Kalaallit Illuutaat eqqarsaatigalugit taamatut suliaqarnissamut inatsisitigut tunngaviusoq erseqqissoq peqqussummi atuuttumi § 25, imm. 1-meereerpoq, siunnersuummi § 27, imm. 3-ikkut ingerlateqqinneqartoq, tassanilu aqutsinerup suliffeqarfimmut namminersortumut tunniunneqarnissaa periarfissaqartinneqarpoq. Taamaalilluni § 27, imm. 2-p siunertaraa oqartussanut suliffeqarfinnullu Namminersornerullutik Oqartussat ataanniittunut tunniussinissamut inatsisitigut tunngavissamik erseqqissumik pilersitsinissaq.

Aammattaaq nutaatut siunnersuummi § 28-kkut siunnersuutigineqarpoq ilinniagaqartut pillugit paasissutissanik pissarsiniarnissamut ingerlatitseqqinnissamullu periarfissaq pillugu aalajangersakkanik ilanngussisoqassasoq. Matumani siullertut siunnersuutigineqarpoq oqartussat il.il. ilinniagaqarnersiutit pillugit malittarisassanik aqutsisut pisortat oqartussaannit, suliffeqarfiinit suliffeqarfinnillu namminersortunit paasissutissanik ilinniagaqarnersiutit pillugit malittarisassat aqunneqarnerannut pisariaqartunik pissarsiniarsinnaassasut: § 28, imm. 1 nr. 1.

Aappaattut § 28, imm. 1, nr. 2-mi siunnersuutigineqarpoq oqartussat il.il. ilinniagaqarnersiutit pillugit malittarisassanik aqutsisut ilinniagaqartoq pillugu paasissutissanik ilinniagaqarnersiutit pillugit malittarisassat aqunneqarnerannut pingaaruteqartunik paarlaateqatigiissinnaasut. Aalajangersakkat marluk taakku paasissutissanik ilinniagaqarnersiutit pillugit malittarisassanik aqutsinermut pingaaruteqartunik pissarsiniarnissamut ingerlatitseqqinnissamullu inatsisitigut tunngavigisap erseqqissup pilersinneqarnissaa siunertaraat.

Siunnersuummi § 28, imm. 1, nr. 3-mi siunnersuutigineqarpoq oqartussat il.il. ilinniagaqarnersiutit pillugit malittarisassanik aqutsisut paasissutissanik innuttaasut Kalaallit Nunaanneersut nunanilluunniit avannarlerneersut Namminersornerullutik Oqartussanit ilinniagaqarnersiutinik tunineqartarnerannut tunngasunik ingerlatitseqqissinnaanerannut inatsisitigut tunngavissaq pilersinneqassasoq, pineqartut piffissami taannaasumi Kalaallit Nunaannit nunalluunniit avannarliit ilaannit ilinniagaqarnersiutinik ataatsikkut pisannginnissaasa nakkutigineqarnerannut pingaaruteqartumik. Taamaattutaaq aalajangersakkap taassuma siunertaraa ingerlatitseqqinnermut taamaattumut marloriaammik tunniussisoqartannginnissaanik nakkutilliisinnaaneranut pingaaruteqartumik inatsisitigut tunngavissaliinissaq.

Kiisalu siunnersuummi § 28, imm. 1, nr. 4-mi siunnersuutigineqarpoq oqartussat il.il. ilinniagaqar-nersiutit pillugit malittarisassanik aqutsisut ilinniagaqartut taamaaliorqarnissaanik akuersisimasut aqqi najugaallu pillugit paasissutissanik pisortani oqartussanut allanut aamma Kalaallit Nunaanni suliffeqarfinnut namminersortunut ingerlatitseqqinnissamut inatsisitigut tunngavissamik pilersitsisoqassasoq, oqartussat suliffeqarfiillu namminersortut taakku ilinniagaqartunik taakku ilinniarnermikkut naammassinninnerisa kingornatigut Kalaallit Nunaanni sulisussarsiniarsinnaanerut, ilinniarnerep nalaani sulinermik

misiliisinnaanerat suliffeqarfiusinnaanerallu eqqarsaatigalugit. Taamatut ingerlatitseqqinnermut inatsisitigut erseqqissumik tunngavissaqarnissaq aalajangersakkap taassuma siunertaraa.

§ 28, imm. 2-ikkut paasissutissanik pissarsiniarnissamut ingerlatitseqqinnissammullu periarfissaq pillugu malittarisassanik aalajangersaanissamut Naalakkersuisut inatsisitigut tunngavissalernerqarput, ilaatigullu siunertarineqarpoq taamaaliornikkut pisuni suni § 28, imm. 1, nr. 4-mi taaneqartuni ingerlatitseqqittoqarsinnaanera erseqqinnerusumik aalajangersaavigineqassasoq.

### **3. Pisortanut aningaasaqarnikkut allaffissornikkullu kingunerisassai.**

#### *3.1 Pisortanut aningaasaqarnikkut kingunerisassai*

Naammagittaalliuuteqartarfiup atorunnaarsinneqarnera aningaasarsiatigut il.il ilaasortallu angala-nerinut aningaasartuutitigut sipaaruteqarfiusinnaavoq. Naammagittaalliuuteqartarfimmu 2002-mi 2003-milu aningaasaliissutit tamarmiusut 110.000 kr.-nut aalajangersarneqarsimapput. Naammagit-taalliuuteqartarfiup atorunnaarsinneqarnera taamaaqataanik sipaaruteqarfiunaviannigilaq, tassami naammagittaalliuutitut suliat suliarineqarnerini atugassiissutinik suliat atuisoqartartussaammat. Tamanna eqqaassanngikkaanni allannguutit kaammattuutitut malitseqartitsinnermut tunngassuteqartut imminni pisortanut aningaasatigut sipaaruteqarfiussanngillat.

Siunnersuulli tapiissutit taarsigassarsiallu pillugit aningaasanut inatsimmi oqaasertaliussani tamatumunnga peqatigitillugu allannguutigitinneqartunut kiisalu immikkut tunniunneqartartut ilinniagaqarnersiutit pillugit nalunaarutip allanngortinneqarneratigut atorunnaarsitsinikkut allannguutigi-tinniakkanut atatillugu isigineqassaaq. Allannguutit taakku kontut pingaarnerit uku eqqorpaat: 40.13.24 Atukkiussat aammalu aningaaserivinni atukkat taarsersorneri, 40.13.50 Ilinniagaqarnersiutit aamma meeqqanut tapit oqaaseqaatertalersugaq aamma 40.13.61 Immikkut tapiissutit, angala-nermut aningaasartuutit il.il., KIIP-ip sulisoqarfii oqaaseqaatertalersugaq.

Konto pingarneq 40.13.26 Ilinniagaqarnersiutinik taarsersuineq, ukiut missingersersuiffiusut ki-ngorna eqqorneqartussaapput ilinniagaqartut ilinniakkaminnik naammassinninnerisa kingorna atukkanik annertunernik peqqussutissatut siunnersuut malillugu atorneqarsinnaasut taasersorlugit aallartinneqarnerisa kingunerisaanik.

2005-imut Aningaasanut Inatsimmut Siunnersuummut aningaasatigut kingunerisassai ataani takussutissiami takuneqarsinnaapput, tassani takuneqarsinnaallutik allannguutissatut siunnersuutit ki-ngunerisaannik atukkat maannakkut peqqussummi atuuttumi atukkanut sanilliunneri:

Ingerlataq, aningaasat tusind kroninngorlugit		2005	2006	2007/08
A	Danmarkimi nunanilu allani akunnattumik qulliunersumillu ilinniagaqarnermi ilinniagaqarnerisutit	787	1.907	1.907
B	Kalaallit Nunaanni akunnattumik qulliunersumillu ilinniagaqarnermi ilinniagaqarnerisutit	477	1.159	1.159
C	Kalaallit Nunaanni Danmarkimilu ilinniagaqarnissammut piareersarluni ilinniagaqarnermi ilinniagaqarnerisutit	318	180	-1.178
D	Piareersarluni atuarneq, Meeqqat Atuarfianni Soraarummeerneq aammalu Annertusakkamik fageni ataasiakkaani Soraarummeerneq	-3.650	-7.300	-7.300
E	Ukiumut taarsigassarsiat	108	4.248	4.248
F	Ataasiarluni taarsigassarsiat	12	12	12
G	Annertunaakkanik ilinniagaqarnerisutininik pissarsinermut atatillugu taarsigassarsiat	15	15	15
H	Timmisartortartunngornianut taarsigassarsiaritit	2	2	2
I	Bussinut qimuttuitsunullu kortit atorunnaarneri	-23	-54	-54
J	Atuakkanik pisineri tapiissutit atorunnaarneri	-222	-443	-443
K	Angalanermi oqimaappallaanik nassataqarnerup akilerneranup tapiissutit atorunnaarneri	-17	-33	-33
Katillugit		-2.192	-307	-1.665

Soorlu konto pingaarnermi AIS 2005 40.13.50-imi, Ilinniagaqarnerisutit aamma meeqqanut tapit, oqaaseqaatini ersitsoq piffissami peqqussutip 1. august atuutilernissaata tungaanut tapiissutit atuuttut aammalu taassuma kingorna tapiissutissatut nutaatut siunnersuutit atuutissapput. Taanna AIS 2005-imi aammalu immikkoortuni a, b, e, i, j aamma k-mi nikingassutinut pissutaavoq.

Naatsorsuutigineqanngilaq qiortartakkatut periutsip eqqunneqarnerani Nunatta karsiata aningaasartuutai qaffassasut. Periarfissaalissagaluarpoq ilinniagaqarnerisuteqartitsinissaq ilinniagaqareersimagaluartunut. Malittarisassat atuuttut malillugit tamanna aatsaat pisinnaavoq ilinniartitaanermut isernissamut suliamik ilinniarsimasutut qaffasissuseqarnissaq piumasaqaataappat, ilinniarneq ilinniagarisimasamut pissusissamisoortumik nangitsissutaappat aammalu suliaqarfiup iluani qaffasinneruppat, imaluuniit inuussutissarsiorsinnaajunnaarnerup

kingunerisaanik ilinniaqqinnissamut ilinniarneq pisariaqarpat. Ilinniagaqarnersiuteqartitsivimmit ilinniagaqarnersiuteqarnissamut itigartinneqarsimasut nalunaarsornerisa takutippaat ilinniagaqareersimaneq peqqutigalugu itigartinneqarsimasut ikittuinnaat qaffasinnerusumik ilinniaqqinnissamut qinnuteqartarsimasut, malittarisassalli nutaat atuutilersinneqarnerisigut taakku amerlilaarnissaat ilimagineqarsinnaavoq. Akerlianik qiortartakkatut periutsip eqqunneqarnerata ilinniartup ilinniagaqarnersiuteqarluni ilinniakkanik arlalinnik aallartitsisinnaanera killilissavaa. Tamanna pillugu naatsorsuutigineqanngilaq Nunatta karsiata aningaasartuutai qaffassasut.

Peqqussutissatut siunnersuummi siunnersuutigineqarpoq meeqqat atuarfianni soraarummeernissamut fagini ataasiakkaani piareersarluni atuarnermi ilinniagaqarnersiutit ukiup atuarfiusup 2004/2005-ip naanerani aammalu ukiuni missingersersuiffiusuni imm. d-mi atorunnaassapput.

Imm. c-mi ukiuni missingersersuiffiusuni ataasiakkaani nikingassutit pissutsinik ukuninnga pissuteqarput:

- Ilinniagaqarnissamut piareersarluni atuarneq ukiuni pingasuni ingerlanneqarajuttarpoq aammalu atuarnut peqqussutissatut siunnersuutip akuerineqareernerani angerlarsimaffiup avataani najugaqartutut akuerineqareersut ilinniarnertik tamaat taamatut inissisimassapput. Taamaammat ukiumi 2005-imi ilimagineqarpoq ilinniarnermik ingerlatsisut 90%-ii angerlarsimaffiup %-imut appassasoq aammalu ukiumi 2007-imi ukiunilu kinguliini 40 %-inngussalluni. Immikkut akuerineqarnissamut periarfissanut malittarisassat ilinniagaqarnersiutit pillugit nalunaarutissakkut Naalakkersuisunit aalajangersarneqassapput.

Ilinniagaqarnissamut piareersarluni atuarnermi sumiluunniit ilinniagaqarnissamik ammaassinissamik kissaateqarneq aningaasartuuteqarnerulernermik kinguneqassaaq, tassa Kalaallit Nunaanni angerlarsimaffilik qaammammut 2.100 kr.-inik ilinniagaqarnersiuteqassammat aammalu Kalaallit Nunaata avataani najugalik qaammammut 4.600 kr.-inik ilinniagaqarnersiuteqassammat. Kisiannili oqaatigineqassaaq misiliummik aaqqiinernut atatillugu Kalaallit Nunaanni ilinniagaqarnissamut periarfissaqarpat Kalaallit Nunaata avataani ilinniagaqarnersiuteqannginnissamik Naalakkersuisut aalajangiisinnaammata. Kalaallit Nunaata avataani ilinniagaqarnissamut piareersarluni ilinniarnissamik misiliummik aaqqiisoqassappat misiliutip aallartinneqannginnerani aningaasanut kingunissai misissoqqaarneqassapput.

Qulliunerusumik ilinniarnerni misiliilluni aaqqiinert aallartinneqarsinnaasut aningaasatigut kingunissaat annikinnerupput, tassa taakkununga ilinniagaqarnersiutit Kalaallit Nunaanni qaammammut 4.200 kr.-iummata aammalu Kalaallit Nunaata avataani 4.600 kr.-iullutik.

Peqqussutissamut siunnersuutip aningaasartassaanik naatsorsuineri tunngaviusuni ilanngunneqanngilaq 2008-mi "Atuarfitsialaap" kingunerisaanik atuarnermi

killiffinni assigiinngitsut marluk soraarummeertussaaneri, pissuseq taanna peqqussutissamut siunnersuutip imatut toqqaannartumik attuumassuteqanngimmat.

### *3.2 Pisortanut allaffissornikkut kingunerisassai*

Ilinniagaqarnersiutisiaqartitsinermi Naammagittaalliuuteqartarfiup atorunnaarsinneqarnera allaffissornikkut oqilisaataasussaavoq. Tamatuma Naammagittaalliuuteqartarfik pillugu malittarisassaliortoqannginnissaa nassatarissavaa. Ataatsimiigiaqqusisoqartassananilu ataatsimiittoqartassanngilaq, tamatumalu sulianik pilertornerusumik suliarinnineq nassatarissavaa. Allaffissornikkut oqilisaaneq immini sulisoqarnikkut ikilisaanermut tungaviusinnaassanngilaq. Tamatumunnga atatillugu oqaatigineqassaaq ullumikkut naammagittaalliuutit pillugit suliat suliarineqarnerinut sulisoq ullup affaanoortoq atorineqarmat.

Immikkut tunniunneqartartut aalajangersimasut peerneqarnerisa qiortartakkanillu atuilernerup allaffissornikkut oqilissaatinik aamma nassataqarnissaat naatsorsuutigineqarpoq. Allaffissornikkut oqilisaaneq oqartussanut suliffeqarfinnullu ilinniagaqarnersiutit pillugit malittarisassanik aqutsisunut agguataarsimavoq, tamannalu taakku arlaannaanniluunniit sulisunik ikilisaa ikilisaanermut immini tungaviusinnaanani.

## **4. Inuussutissarsiutinik ingerlatsisunut aningaasaqarnikkut allaffissornikkullu kingunerisassai.**

Siunnersuut inuussutissarsiutinik ingerlatsisunut aningaasaqarnikkut kinguneqartussaannngilaq.

## **5. Avatangiisinut kingunerisassai.**

Siunnersuut avatangiisinut kinguneqartussaannngilaq.

## **6. Innuttaasunut allaffissornikkut kingunerisassai.**

Siunnerssuutip ilinniagaqarnersiutit pilugit malittarisassanik ataatsimut pisariillisaanerata ilinniagaqartunut sunniuteqarnissaa naatsorsuutigineqarpoq.

## **7 Annertuumik kingunerisinnaasai allat.**

Siunnersuummi sulisussarsiniarnermi atugassatut paasissutissanik ingerlatitseqqittarneq pillugu § 28, imm. 4-mi malittarisassat Kalaallit Nunaanni oqartussat suliffeqarfiillu kalaallinut ilinniagaqartunut ilisaritinnissaminnut pitsaanerusumik periarfissaqalernissaat naatsorsuutigineqarpoq, tamatumuunalu kalaallit Kalaallit Nunaata avataani ilinniagaqartut amerlanerusut ilinniakkaminnik naamassinninnermik kingornatigut Kalaallit Nunaanni suliffeqartalernissaat aamma ilinniarnep nalaani suliffimmik misiliinissamut suliffeqarnissamullu periarfissat pilersinneqarnissaannut periarfissat pitsaanerusut pilersinneqarnissaat naatsorsuutigineqarpoq.

## **8 Naaalagaaffeqatigiinnermut namminersornermullu tunngasut.**

Siunnersuut namminersornermik annertunerusumik imaluunniit namminersornermut annertuneru-sumut tunngaviliissasoq naatsorsuutigineqanngilaq.

## **9 Oqartussat kattuffiillu il.il. tusarniaavigineqartut.**

Siunnersuut makkununga tusarniaassutigineqarpoq:

Qitiusumik ilinniarfinnut tamanut  
Tunngaviusumik ilinniarfinnut tamanut  
Peqqissaanermik Ilinniarfik  
Perorsaanermik Ilinniarfik  
Savaatilissat Ilinniarfiat  
GU-Nuuk  
GU-Qaqortoq  
GU-Aasiaat  
Ilinniarfissuaq  
Ilisimatusarfik  
Eqqumiitsuliornermik Ilinniarfik  
Inunnik Isumaginnittunngorniat Ilinniarfiat  
Tusagassiornermik Ilinniarfik  
Oqaatsinik Pikkorissarfik  
Danmarkimi Kalaallit Illui  
KANUKOKA  
KIK  
DKIK  
Attaveqatigiinnermut Ineqarnermullu Pisortaqaarfik

Naalakkersuisut Allattoqarfiat  
Aqutsinermut Pisortaqarfik  
Ilaqutariinnermut Pisortaqarfik  
Peqqissutsimut Pisortaqarfik  
Aningaasarsiornermut Pisortaqarfik  
HST  
SIK  
Kalaallit Nunaanni Sulisitsisut Peqatigiiffiat

Tusarniaanermi akissutit ukunannga tiguneqarput: GU Nuuk, STI Maniitsoq, Ineqarnermut Attaveqarnermullu Pisortaqarfik, Ilinniarfissuaq, PIP, ILIK, SIK, Aningaasaqarnermut Pisortaqarfik, Århusimi Ålborgimilu kalaallit illui, Aqutsinermut Pisortaqarfik, Kalaallit Nunaanni Sulisitsisut Peqatigiiffiat, ISI, KANUKOKA, Ilisimatusarfik, Peqqissaanermik Ilinniarfik, Sulisitsisut Peqatigiiffiat ILIK kiisalu Kalaallit Nunaanni Danmarkimilu Ilinniagaqartut kattuffii.

Tusarniaanermi akissutit peqqussummut siunnersuummi nassuiaatinilu ilanngullugit suliarineqarput sumut tunngassuteqarneri naapertorlugit.

Tusarniaanermi akissutinut ataasiakkaani oqaaseqaatit pillugit uku ilisimatitsissutigineqarsinnaapput: GU Nuuk tusarniaanermi akissummini taavaa kollegiani najugaqartut nerisaqarnerat pillugu oqaasertaliussaq imatut paasineqartoq ilinniartut tamakkiisumik nerisassaqaartinneqartassasut. Taassuma kingunerissavaa aningaasartuuteqarnerulerneq aammalu sulisunik amerlanernik atorfinitsitsineq. Taassuma kinguneranik oqaaseqaatit allanngortinneqarput, taamaalilluni „nerisassat" imatut paasineqartussanngorlugit ullaakkorsiorneq kiisalu kissartunik ullup qeqqasiorneq.

Kalaallit Nunaanni Sulisitsisut § 1, imm. 4 tunuarsimaarfigaat, tassani misiliutitut ilinniagaqarnerisuteqarnissaq periarfissinneqarpoq taamatut ilinniagaqarnissamik Kalaallit Nunaanni periarfissaqaraluartoq. Akerliliineq malinneqanngilaq, tassa kiffaanngissuseqarnerulluni ilinniagaqarnissamik toqqaasinnaanerup ammaanqe qarnissaa erseqqarissumik politikkikkut kissaataammat.

KANUKOKA-p tusarniaanermi akissuteqarnermini siunnersuutigaa Danmarkimi ilinniagaqartut sivisuumik ilinniagaqareerlutik Kalaallit Nunaanni suliffissarsiorneqarnissamut kajumissaarniarlugit Kalaallit Nunaanni atorfininnermi ilinniarnermi aningaasat atukkat tamakkiisumik ilaannakortumilluunniit taarsinngitsoorneqarsinnaassasut. Isumassarsiaq pitsaasuvoq, kisiannili siunnersuummut ilanngunneqanngilaq, ilinniagaqarnermi taarsigassanik taarsersuinnermi tapiissutit pillugit Inatsisartut Inatsisaanni nr. 24-mi 3. november 1994-imeersumi inuit Kalaallit Nunaanni najugaqartut taarsersuiniarneranni oqilisaassisarsinnaaneq periarfissaqareemat.

Aammattaaq KANUKOKA-p oqaatigaa FSA/FSUA-mi faginik ataasiakkaanik atuarnermi ilinniagaqarsiteqarsinnaanermut periarfissap peerneqarnera akerleralugu. Ilisimatitsissutigineqarsinnaavoq aaqqiinerup taassuma atorunnaarneranut pissutaasoq sumiiffinni ataasiakkaani inuussutissarsiutinut



atuarfinni immikkut ilinniagaqarnissaq inuussutissarsiuteqarnissarlu pillugit aallarniutaasumik pikkorissarsinnaaneq eqqunneqarmat, tassanilu aamma fagini ataasiakkaanik atuatoqarsinnaavoq. Taamaammat meeqqat atuarfianni fagini ataasiakkaani atuatuarnermi maannamut ingerlanneqartumi ilinniagarsiaqarsinnaanermut pisariaqartitsisoqanngitsutut isikkoqarpoq.

Ineqarnermut Attaveqarnermullu Pisortaqaqfiup tusarniaanermi akissummini oqaatigaa pissusissamisunnngitsutut isigalugu Kalaallit Nunaata avataani ilinniagaqarnerup nammineerluni aningaasalersuisoqarnerani ilinniagaqarnerisuteqartoqarsinnaannginnera § 8-p taamanikkut oqaasertalersornerata kingunerisussaammagu. Akerlilineq malinneqarpoq aammalu peqqussutip oqaasertaa oqaaseqaatillu aqqinneqarlutik. Aammattaaq oqaatigineqarpoq § 24, imm. 1 nr. 3-mi aalajangersagaq kattuffinnut pinngitsoorani ilaasortaasariaqarnertut paasineqarsinnaasoq. Taamatut isumaqarneq Naalakkersuisut isumaqatiginngilaat. § 24, imm. 3-mi ersarissumik allaqqavoq ilinniagaqartut ilinniagaqartut kattuffiini ilaasortaajunnaarsinnaasut.

Peqqinissamut Ilinniarsiup allatulli qiortagaqarnermik aqqissuussinermut oqaaseqaateqarpoq. Tassani ilisimatitsissutigineqarsinnaavoq aqqiinnermi tassani immikkoortualuit ilinniagaqarnerisutit pillugit nalunaarummi ilanngunneqarumaarmata. Nalunaarummut tassunga siunnersuut peqqussutissamut siunnersuutip UKA2004-mi saqqummiunneqarnera peqatigalugu suliarineqarsinnaanera ilimagineqarmat.

Aningaasaqarnermut Pisortaqaqfiup siunnersuummi naatsorsuutit akuera.

## **Siunnersuummi aalajangersakkat ataasiakkaat**

### **pillugit oqaaseqaatit**

#### *§ 1-imut*

Aalajangersagaq taanna, imm. 4 nutaajusoq eqqassanngikkaanni, peqqussummi atuuttumi § 1-imik ingerlatseqqinneruvoq.

#### *Imm. 1-imut*

Imm. 1-ip ilinniagaqarnerisutit tunniunneqartarnerannut aallaaviusoq aalajangersarpaa, - tassalu ilinniagaqarneq Kalaallit Nunaanni ingerlanneqassasoq. Ilinniagaq pineqartoq ilinniagaqarnerisutisiffiusinnaatitaappat, ilinniagaqarnerisutisiaqarnissamullu piumasaqaatit allat qinnuteqartup

eqqortissimappagit ilinniagaqarnersiutisiaqartitsisoqassaaq, tak. siunnersuummi § 2. Kisianni ilinniarnep Kalaallit Nunaanni suliffissaqalersitsinissaa naatsorsuutigineqassasoq piumasaqaataangilaq, tamannali ilinniagaq Kalaallit Nunaata avataani ingerlanneqassappat piumasaqaataalluni, tak. siunnersuummi § 1, imm. 2, nr. 1.

#### *Imm. 2-mut*

Imm. 2-mi ilinniarnep Kalaallit Nunaata avataani ingerlanneqartut pineqarput. Ilinniarnep Kalaallit Nunaanni suliffissaqalersitsinissasoq naatsorsuutigineqarsinnaanersoq Naalakkersuisut erseqqissumik nalileereernermikkut aalajangiivigisassavaat. Ilinniakkap taassuma assingata Kalaallit Nunaanni ingerlanneqarsinnaannginnera eqqarsaatigalugu qinnuteqartup Kalaallit Nunaanni ilinniakkap taassuma assinganut tiguneqarnissamik itigartinneqarsimanerata naammassiniarneqarneranut tamanna takussutissaangilaq.

#### *Imm. 3-mut*

Imm. 3-mi pisuni immikkut illuinnartuni imm. 2-mi piumasaqaatit saneqqunneqarnissaannut periarfissiisoqarpoq. Ilinniagaqarnersiutit pillugit nalunaarummi atuuttumi (nr. 3-mi 6. februar 1998-imeersuummi) § 10 malillugu immikkut akuersissuteqartoqarsinnaavoq, inuttut atukkat immikkut ittut tamanna ajornartinnigippassuk, aalajangersakkamilu tassani pissutsit immikkut ittut pillugit assersuutinik taasaqartoqarpoq.

#### *Imm. 4-mut*

Misileraalluni aaqqissuussinermut ilaatillugu imm. 2, nr. 2-mi piumasaqaammik Naalakkersuisut saneqqutsinissaannut imm. 4 inatsisitigut tunngavissaliivoq.

Aalajangersakkap taassuma tunuliaqutaa siunertaalu eqqarsaatigalugit nalinginnaasumik nassuiaatit innersuussutigineqarput.

#### *Imm. 5-mut*

Aammattaaq misileraalluni aaqqissuussinernit pillugit malittarisassanik aalajangersaanissamut Naalakkersuisut inatsisitigut tunngavissalernerqarput. Matumani ilinniagaqarfiiit soorliit iluanni taamaattoqassappat misileraalluni aaqqissuussinernik pilersitsisoqassanera pillugu malittarisassanik aalajangersaasoqarnissaa naatsorsuutigineqarpoq. Tamakkua saniatigut misileraalluni aaqqissuussinernut peqataanissamut tunngaviit pillugit malittarisassanik aalajangersaasoqarnissaa aamma naatsorsuutigineqarpoq.

## § 2-mut

Aalajangersagaq taanna peqqussummi atuuttumi § 2-mik allannngortinneqanngitsumik ingerlatseqqinneruvoq.

Aalajangersakkami tassani Naalakkersuisut pisinnaatinneqarput ilinniarnep ilinniagaqarnersiutisiaqaataasinnaasutut isigineqarnissaani ataatsimut piumasaqaatinik aalajangersaanissaminnut. Matumani siunertaavoq ilaatigut ilinniarnep ilinniagaqarnersiutisiaqaataasinnaassappat tunngaviusumik piumasaqaataasunik (assersuutigalugu ilinniartitsinerup illutatigut sinaakkutassai, ilinniartitsissutitigut imarisai, sivirususia il.il. eqqarsaatigalugit) arlalinnik eqqortitsisuunissaata qulakkeerneqarnissaa. Aammattaaq siunertaavoq ilinniartitsinerup aalajangersimasunut peqqusutikkoortumik qilersuisinnaanerup taamalu ilinniartitsinerit nutaat naleqquttut ilinniagaqarnersiutisiaqaataasinnaanerannik mattussisinnaanerup pinaveersarneqarnissaa.

Ilinniagaqarnersiutit pillugit nalunaarummi atuuttumi (nr. 3-mi 6. februar 1998-imeersumi) ilinniartitsinerup ilinniagaqarnersiutisiaqaataasinnaasutut qaqugukkut akuerineqarsinnaanera pillugu aalajangersagaqarpoq.

## § 3-mut

Aalajangersagaq taanna peqqussummi atuuttumi § 2a-mik ingerlatseqqinneruvoq. Taamaattorli imm. 2 aamma imm. 3 inatsisiliornermi teknikki pissutigalugu maani ilanngunneqarsimannngillat, siunnersuummili § 5-imut ilaatinneqarlutik.

Aalajangersakkakut tassuuna akissarsianut aningaasartuutitut sulisitsisup inuussutissarsiornermi tunngaviusumik ilinniartitsinerne lęrlingini Kalaallit Nunaanni praktikkertunik ilinniagaqarnerminnilu Danmarkimiittunik atorfinitsitsinerne aningaasartuutigisaanut ilinniagaqarnersiutit tapiissutitut atornerqarsinnaanerannut inatsisitigut tunngavissaliisoqarpoq.

## § 4-mut

Aalajangersagaq taanna peqqussummi atuuttumi § 3-mik tunngaveqarpoq.

### *Imm. 1-imut*

Imm. 1-imi oqaasertalersuinerne "tunniunneqarsinnaapput"-mik atuinikkut erseqqissarneqarpoq tapeeriaatsit taakku aalajangersakkami periarfissaasut. Imm. 3-mi aalajangersakkamut ataneqartitsigaanni tamaalillutik tapeeriaatsit sorliit pisuni pineqartuni atornerqarsinnaanerat pillugu malittarisassanik Naalakkersuisut aalajangersaasinnaassapput. Malittarisassat atuuttut malillugit tapiissutit (stipendier),

immikkut tunniunneqartartut taarsigassarsiallu Nunatta Karsianit aningaasalersugaasut atorneqarput.

Imm. 1-imi allannguuteqartitsisoqarpoq ilinniagaqarnersiutit tapiissuteqariaatssip killilikkap „qiortaariaatsip" iluani ilinniagaqarnersiutit atorneqarsinnaasut. Tamanna "Ilinniagaqarnersiutitik iluarsaaqqinneq pillugu nassuiaat"-mi tamanna pillugu kaammaattutit malillugit pisimavoq.

Qiortaariaatsip tunngavia tassaavoq ilinniartitsinerni tamani ataasiakkaani ilinniagaqartoq ilinniagaqarnersiutitik tunniussassanik aalajangersimasunik amerlassusilinnik „qiortagassaq" tunineqartassasoq, taamatullu tunniussisoqarnerit tamaasa, immaqanna manna tikillugu qaammammoortumik tunniussisarnertut, "qiortagassaq" qiorsivigineqartassalluni.

#### *Imm. 2-mut*

Peqqussummi atuuttumi § 3, imm. 2-mut sanilliullugu allannguuteqartitsisoqarpoq, tassa ilinniagaqartut kattuffii pisinnaatinneqarmata Naalakkersuisut isumasioqatigalugit tapiissutinut taarsigassaarsianullu immaqalu immikkut tunniunneqartartunut amerlassusiliussat oqaluuserinissaannut, taakku aningaasanut inatsimmi aalajangersarneqarnissaat sioqqullugu. Kattuffiit manna tikillugu taamaallaat tusarniaavigineqarsinnaatitaasimagaluarput. Allannguut taanna kattuffiit qaninnerusumik peqataatinneqarnissamik kissaateqarnerat tunngavigalugu allannguutigitinneqarpoq. Taamaaliornikkut ukiut tamaasa aningaasanut inatsisip akuerineqarnissaa sioqqullugu siunissami aningaasartaliunneqartussat pillugit isumasioqatiginnittoqartarnissaa siunniunneqarpoq. "Isumasioqatiginninneq" "isumaqatigiinniarneq"-mut taarsiullugu atorneqarpoq, takutinniarlugu suliffeqarnermut tunngasuni akissarsiat pillugit isumaqatigiinniartarnerit pineqanngitsut, pineqartorli tassaalluni ani-ngaasat immikkoortinneqartut qanoq iliorluni pitsaanerpaamik agguataarneqarnissaannut ilinniagaqartut oqaloqatigiinnertigit annertuumik sunniuteqalernissaat. Amerlassusiliunneqartut allan-ngortinneqarnissaat Inatsisartut suli aalajangigassaraat.

#### *Imm. 3-mut*

Aalajangersagaq taanna peqqussummi atuuttumi § 3, imm. 3-mik allanngortinnagu ingerlatseqinneruvoq.

Manna tikillugu pisarnertut ilinniagaqarnersiutit suussusissaannik annertussusissaannillu aalajangersaanissamut Naalakkersuisut inatsisitigit tunngavissinneqarput. Assersuutigalugu qiortagassanik atuilernerup kingunerisaanik ilinniagaqarnersiutit pillugit nalunaarutip, ilinniagaqarnersiutit pillugit Namminersornerullutik Oqartussat nalunaarutaata nr. 3-p 6. februar 1998-imeersup, atuuttup annertuumik allanngortinneqarnissaa pisariaqartinneqarpoq, tassami tassanerpiaq qiortaariaatsip ingerlanneqarnissaa pillugu malittarisassat pisariaqartinneqarmata, matumani ilinniartitsinernut ingerlariaqqiffiusunut qiugassat

qassiussusiat, pisunilu aalajangersimasuni, assersuutigalugu erninermut atatillugu ilinniannigiffeqarnermi, ilinniakkanik aaqqissuussinermik sulinermi il.il. peqataanermi, qiugassanik amerlanerusunik tunniussinissamut periarfissat pillugit malittarisassat ilanngullugit eqqarsaatigalugit.

Qiortaariaaseq ukiunut arfineq marlunnet qiortaanermi sinaakktassatut, eqqornerusumilluunniit oqaatigalugu ukiuni arfineq marlunni ilinniagaqarnersiutisiaqartitsinertut, ilusilerneqarnissaa naatsorsuutigineqarpoq. Ilinniartitsinernut ataasiakkaanut ilinniarnep ukiunik aalajangersimasunik sivissuseqarnissaanik naatsorsuutigisat ukiumik ataatsimik ilasat malillugit ilinniarnermut tapiissuteqartoqarsinnaasussaavoq. Taamaalilluni ilisimatusarfimmi bachelorimut tunngasortaani ukiunut ilinniarfissanut ukiumik ataatsimik ilasanut kiisalu kandidatitut ilinniarnermut tunngasortaani ukiunut ilinniarfissanut ukiumik ataatsimik ilasanut tapiissuteqartoqarsinnaavoq. Ilinniartitsineq sivikinnerpaaq ukiunut arfineq marlunnet qiortaanissamut pisinnaatitaaffiunngitsoq qineraanni taamaalillunilu qiugassanik sinneqartooraanni taakku kingusinnerusukkut nutaamik ilinniagaqarnissaq kissaatigigaanni atorneqarsinnasussaassapput. Pisuni taamaattuni ukiuni arfineq-marlunni ilinniagaqarnersiutisiaqartoqarsinnaavoq, ukiut ilinniarnersiutisiaqarfioersimasut ilanngaatigalugit. Tamanna malittarisassanut massakktut atuuttunut sanilliullugu pitsanngoriaataavoq, massakkummi malittarisassat malillugit ilinniagaqarsimasutut qaffasissusilimmik tassanngaluunniit qaffasinnerusumik inaarlugu ilinniakkamut taamallat ilinniarnersiutisiaqartitsisoqarsinnaammat.

#### *§ 5-imut*

Aalajangersakkakktut tassuuna aalajangersarneqarpoq tapiissutit aningaasanut inatsisikkut aalajangersarneqassasut, tapiissutillu Nunatta Karsianit aamma AEB pillugu inatsit malillugu sulisitsisut akileeqataassutaannit aningaasalersorneqassasut, aningaasaleeqataassutillu taamatuttaaq aningaasanut inatsisikkut aalajangersarneqassasut.

Aammattaq aalajangersagaq ikkunneqarsimavoq, tapiissutit siunertaat, aqunneqarnerat, tapiissutisisinnaassagaannilu tapiissutisisinnaassagaannilu piumasaaqatit, tapiissutit amerlassusii tunniunneqartarnerallu pillugit malittarisassanik aalajangersaanissamut Naalakkersuisunut piginnaatitsisoq.

Siunnersuutikkut anguniarneqarpoq sulisitsisunut lęrlinginik atorfinitsitsisunut tapiissutit siunertaat pillugit malittarisassanik aalajangersaasoqarsinnaasasoq. Siunertat pingaarnerpaat ilaat tassaavoq ilinniartut naammattunik amerlassuseqartut pitsaassuseqarluartumik angusaqarlutik ilinniartinneqarnissaanni sulisitsisut tamarmik uummaarissumik peqataassasut, taamaaliornikkut suliffeqarnermut tunngasuni sulisunik ilinniarsimasunik pisariaqartitsineq matussutissaqartinneqarsinnaaqqullugu.

Aammattaaq tapiissutit aqunneqarnerat pillugu malittarisassat Naalakkersuisut aalajangersarsinnaavaat. L rlinginik sulisitsisut atorfinitsitsisut tapiiffigineqartarnissaannut malittarisassanik l rlingitullu isumaqatigiissut atorunnaarpat tapiissutit unitsinneqartarnissaannik qulakkeerisunik Naalakkersuisut aalajangersaalersaarput. Tapiissutit kikkunnit aqunneqarnerat qanorlu iliorluni aqunneqarnissaat pilugit malittarisassat aammattaaq aalajangersarneqarsinnaapput.

Tapiissutisisinnaassagaanni piumasaqaatit aalajangersarneqarsinnaapput. Taakku tassaasinnaapput malittarisassat l rlingit piffissaq tamaat atorfinitsinneqartarnissaannik, sulisitsisut AEB-mut akileeqaataassutinik kinguaattooqqannginnissaannik piumasaqaatinilluunniit allanik tapiissutisisinnaassagaanni sulisitsisup l rlingilluunniit eqqortissimassasaanik aalajangersaaviusut.

Tapiissutit annertussusissaat tunniunneqartarnerallu pillugit malittarisassani tapiissutit amerlassusissaannut piffissakkuutaartumillu tunniunneqartarnissaannut tunngasuunerussapput, assersuutigalugu qaammatikkuutaartumik tunniussisoqartassanersoq imaluunniit kvartalikkuaartumik tunniussisoqartassanersoq. Sulisitsisunut tunniunneqartartut qanoq iliorluni naatsorsorneqartarnissaat tunniunneqartarnissaallu, piffissap l rlingip atorfeqarfigisaata sivisussusia tunngavigalugu naatsorsuisoqartassanersoq, imaluunniit l rlingi piffissap tunniussiviusup nalaani aatsaat atorfeqartinneqarpat sulisitsisumut tunniussisoqartarnissaa pillugu malittarisassat aalajangersarneqassapput.

#### *  6-imut*

Aalajangersagaq taanna peqqussummi atuuttumi   4-mik allanngortinnagu ingerlatseqqinneruvoq.

Aalajangersakkami erseqqissarneqarpoq pisinnaatitaaffiit nunat tamat akornanni isumaqatigiissutinit isumaqatigiissutinit ikorfartorneqartut Kalaallit Nunaannut atuuttut kisimik tassaasut nunani allamiunut ilinniagaqarnersiutisiaqarsinnaalersitsisut. Matumani ataqatigiinneqarnermi tassani isumaqatigiissutit Danmarkip ilannguffigisimasai, Namminersornerullutilli Oqartussanut atuutinngitsut inatsiseqartitsinikkut tunngavigineqarsinnaannginnerat erseqqissarneqassasoq siunertarineqarpoq.

#### *  7-imut*

Aalajangersagaq taanna peqqussummi atuuttumi   5-imik allanngortinnagu ingerlatseqqinneruvoq.

Inuup aalajangersimasumik najugaqarneranik aalajangiiniarneq inuit aqqinik nalunaarsuiffiit pillugit inatsimmi tamanna pillugu malittarisassat malillugit pisassaaq.

#### § 8-mut

Aalajangersagaq taanna peqqussummi atuuttumi § 6-imik allanngortinnagu ingerlatseqqinneruvoq.

##### *Imm. 1-imut*

"Qinnuteqarnerup naalaa" tassaatinneqarpoq piffissaq qinnuteqaatip oqartussamit ilinniagaqarnersiutit pillugit malittarisassanik aqutsisup tigusiffigisaa.

##### *Imm. 2-mut*

Immikkoortumi tassani allannguuteqartitsisoqarpoq, tassa qallunaatuaani allanneqarneranik allanngortitsinikkut. Taamaaliortoqarpoq erseqqissarniarlugu pineqartut taamaallaat tassasut isumaginninnermut tunngasut Kalaallit Nunaanni oqartussaasut peqataaffigisimasaat.

Aamma oqaatigineqassaaq ilinniarnermut tunngasuni meeqqat atuarfiannit siumut pisut pineqarmata.

#### § 9-mut

Aalajangersagaq taanna peqqussummi atuuttumi § 7-imik allannguuteqalaartumik ingerlatseqqinneruvoq.

##### *Imm. 1-imut*

Aalajangersakkap siunertaa tassaavoq erseqqissassallugu pisortanit allatigut tapiissutit ilinniagaqarnersiutinit siulliummata, taamalu pisortanit allatigut tapiissutit ilinniagaqarnersiutillu ataatsikkoortillugit pisartagarineqarsinnaanngimmata, inuuniarnermut aningaasartuutit pisortanit tapiissutitigut matussuserneqartarpata.

Aalajangersagaq taanna ilaatigut inunnut pensionisiaqartunut, matumani siusinaartumik pensionisiaqartut ilanngullugit eqqarsaatigalugit, atorneqarsinnaasussaavoq. Aalajangersagaq taanna aamma atorneqarsinnaasussaavoq ilinniagaqartoq nunap allap malittarisassai malillugit

ilinniagaqarnersiutisiaqarpat. Pingaarnepaasoq tassaavoq pineqartup pisortanit marloriaammik pilersorneqannginnis-saata qulakkeerneqarnissaa.

"Pisortanit ikiorsiissutinik allanik" oqarnikkut taamaallaat tapiissutit/ikiorsiissutit ilinniagaqarnersiutinit allaasut pineqarnissaat kisimi erseqqissarniarneqarpoq.

Imm. 1-imi allannguuteqartitsisoqarpoq, taamaallaat tapiissutit meeqqanullu tapit tunniunneqarnissaat kisimi mattunneqarsinnaasoq. Peqqussummi atuuttumi § 7, imm. 1 tunngavigalugu ilinniagaqartoq ilinniagarneqarnersiutisiaqarnissaminut mattunneqarsinnaavoq, tassalu aamma immikkut tunniunneqartartut ilanngullugit. Ilinniagaqartut pisuni taamaattuni immikkut tunniunneqartartunik tunineqarnissaminut mattunneqarnissaat siunertaasinnaanngilaq, tassami tapiissutit meeqqamullu tapit kisimik inuuniarnermi aningaasartuutitut matusissutissatut isigineqarmata. Siusinaartumik pensio-nisiaqartoq ilinniagaqartoq kommunimit pensioninik meeqqamullu tapinik pisartagaqarajuttussaavoq, kommunilli angalanernut il.il. aningaasartuutit akilissanagit.

#### *Imm. 2-mut*

Aalajangersakkap taassuma ilinniagaqartup ilinniagaqarnersiutinik inuuniarnermi aningaasartuutitut matusissutissatut naatsorsuunneqartunik aamma ilinniarnermi taarsigassaarsianik imaluunniit ilinniarnermi akissarsianik allanik tigusaqartannginnissaa qulakkiissavaa.

Aalajangersakkami tassani peqqussummi atuuttumi § 7, imm. 2-mut sanilliullugu marlunnik allan-ngortitsisoqarsimavoq.

Siullertut "inuuniarnermut aningaasartuutit" "ilinniagaqarnersiutitut ittunut"-mut taarsiullugu atorneqarsimavoq. Tamanna ilinniagaqarnersiutit arlalinnik immikkualuttoqartarnerannik pissuteqarpoq, taakkulu ilaannaat inuuniarnermi aningaasartuutitut matusissutissatut isigineqarput, tak. imm. 1-imi tamanna pillugu oqaseqaatit.

Aappaattut erseqqissarneqarpoq tapiissutit kisimik tassaasut ilinniagaqartut pisuni taamaattuni pisinnaanngisaat. Ilinniagaqartut ilinniarnermini akissarsiaqartut imaluunniit ilinniarnermi allatut aningaasarsiaqartut tasaanerupput inuussutissarsiuutinik tunngaviusumik ilinniartitsinerni lęrlingit, sulisitsisuminnit akissarsiaqartut. Taakku meeqqanut tapinik immikkullu tunniuttakkanik pisinnaajuaannassapput.

#### *§ 10-mut*

Aalajangersagaq taanna ataasiinnarmik allannguuteqarluni peqqussummi atuuttumi § 8-mik ingerlatseqqinneruvoq.



Aalajangersakkami erseqqissarneqarpoq pissutsit ilinniagaqartup atugai allannguuteqarpata tamanna ingerlaannartumik nalunaarutigineqassasoq. Tassalu imaappoq pisariaqanngitsumik kinguarsaanani.

Taamaalilluni ilinniagaqartup assersuutigalugu ilinniarnerninik unitsitsinini, sivisuumik napparsimanini imaluunniit nammineq meeqqaminut pilersuisussaataitanermini allannguutit ilinniartitaaffimminut nalunaarutigissavai.

Aammattaaq ineqarnermut tunngasut allanngutaat tamatumani pineqarsinnaapput, ilinniagaqartoq ilinniakkaminut piareersarnermini avataani najugaqartutut inissisimasutut immikkut akuerisaappat taavalu tamatuma kingornatigut angajoqqaaminut nuulluni.

Paasissutissisussaataitanermik malinninnginnerup kinguneri manna tikillugu pinertut ilinniagaqarnersiutinik tigusassarinagit tiguneqartunik ernialersuineq utertitsillunilu akiliineq pillugu kapitalimi aalajangersarneqarsimapput.

Aalajangersagaq taanna nutaattut siunnersuummi § 28-kkut paasissutissanik pissarsiniartarneq i-ngerlatitseqqittarnerlu pillugit aalajangersakkanik nutaanik massakkut ilaneqarpoq. Tamanna naapertorlugu aalajangersakkami "ilinniagaqarnersiutit pillugit malittarisassanik aqutsineq" "ilinniagaqarnersiutinik tunniussiusarneq"-mut taarsiullugu atorneqarpoq.

#### *§ 11-mut*

Aalajangersagaq taanna allannguuteqarnani peqqussummi atuuttumi § 9-mik ingerlatseqqinneruvoq.

Aalajangersakkami erseqqissarneqarpoq piginnaatitsinermi piumasaqaatinik amerlanerusunik aalajangersaasinnaaneq kisimi pineqartoq, tassanilu piumasaqaatit peqqussummi aalajangersarneqarsimasut saniatigut piumasaqaataasut eqqarsaatigineqarlutik. Piumasaqaatinik taakkuninnga aalajangersaanermi piumasaqaatit ilinniagaqarnersiutit pillugit nalunaarummi aalajangersarneqarsimasut aallaavigineqassapput, matumani ilinniarnermik ingerlatsineq pillugu piumasaqaatit aamma piffissap ilinniagaqarnersiutisiaqarfiusup sivisussusia kiisalu qiortaariaaseq siunnersuutigineqartoq pillugu malittarisassat ilanngullugit eqqarsaatigalugit.

#### *§ 12-imut*

Aalajangersagaq innersuussutit kingunerisaannik allannguutit eqqaassanngikkaanni peqqussummi atuuttumi § 10-mik allangortinnagu ingerlatseqqinneruvoq.

§ 6-ip aamma § 8, imm. 1-ip saneqqunneqarsinnaanerannut pingaartumik pissutsit ilaqtariinnermut tunngasut tunngavilersuutaasinnaasussaapput. Apparisaq

inooqatigisarluunniit ilinniagaqartoq peqatigalugu Kalaallit Nunaannit Danmarkimut nunamulluunniit allamut nooqataappat, aammattaaq allaat kingusinnerusukkut Kalaallit Nunaata avataani ilinniakkaminik aallartinnissani kissaatigiguniuk immikkut akuerineqarsinnaassalluni.

§ 7-ip saneqqunneqarnera pisuni inuup aalajangersimasumik najugaqarfiginngisaani, taamaattorli Kalaallit Nunaat najugaqarfittut isigineqartillugu, taamaallaat pisinnaavoq.

### *§ 13-imut*

Aalajangersagaq taanna ikittuinnarnik allannguuteqarluni peqqussummi atuuttumi § 11-mik ingerlatseqqinneruvoq.

#### *Imm. 1-imut*

"Ilinniartitsineq"-kut erseqqissarneqarpoq aallaavik tassaasoq ilinniartitsinerup naammassineqarnissaanut taarsigassarsiat pineqartut kisimik ernialersorneqassanngitsut.

Ilinniarnerup nalaani ernialersuinerup unitsinneqarnissaanut tunngavittut imm. 1-imi piunasaqaatigineqarpoq taarsigassarsisoq ilinniagaqarnersiutinik pisinnaatitaaffimminik Namminersorerullutik Oqartussanit tiguisartuussasoq. Tassani ilinniarnermik ingerlatsinermik piunasaqaatip ernialersuiunnaarnermut ataneqartinneqarnissaa pingaartumik siunertarineqarpoq.

#### *Imm. 2-mut*

Aalajangersakkami ernialersuineq piffissaq suna aallartissasoq erseqqissarneqarpoq. Ernialersuinerup aatsaat ullup taamaatitsiviusup naammassiviusulluunniit kingornatigut aallartinnissaa teknikkikkut allaffissornikkullu pissuteqarpoq.

Aammattaaq suna ernialersuinerup pissutaatinneqarnersoq erseqqissarneqarpoq. "Sukkulluunniit akiitsorineqartut"-p atorneqarneratigut erseqqissarneqarpoq ernialersorneqartut tassaasut taarsigassarsiat tunngaviusumik aningaasartaat, ernialikkat naafferartumillu akilerneqarsimasunik ilanngarneqarsimasut. Tamatumunnga peqatigitillugu "sukkuulluunniit akiitsorineqartut"-p atorneqarneratigut erseqqissarneqarpoq ernianik naatsorsuineq aningaaserivinni naatsorsuinerup pisartoq, tassalu ullormit ullormut.

Imm. 2-mi aalajangersakkami qaqugukkut ernialersuisoqartassasoq aalajangersarneqarpoq. Erniat ukiumoortumik ilanngunneqartarnerisa tamatumunnga peqatigitillugu erseqqissarpaat erniat erniaannik ukiumoortumik ilanngussisoqartartoq, tamannalu taarsigassarsianut tunngasuni ingerlaavartuni

ernialersuinermi atugassarititaasoq nalinginnaasoq. Taarsigassarsiat killiffiat ukiumut ataasiarluni naatsorsorneqartarpoq, tamatumalu kingornatigut naatsorsorneqartut erniaat naatsorsorneqassallutik, tassalu imaappoq taarsigassarsiat tunngaviusumik aningaasartaat ernialikkat naafferartumillu akilersorneqarsimasunik ilanngakkat.

Ernialersuinerup ukiumoortumik aningaasanut inatsisitigut pinnani peqqussummi ilanngunneqarnera tassaavoq ilinniartitsinermik naalackersuinnikkut ingerlatsinermi kissaatigisap tassalu ilinniarnermi taarsigassarsiat erniakitsuunerannik aningaasaqarnikkullu ingerlatsinermi isumaliutersuutinut ilaatinneqarsinnaannginnerannik kissaateqarnerup saqqummersinneqarnerat. Diskonto tassaavoq 1996-imi aningaasanut inatsimmi akiitsunut 1/8-1995-ip kingortigut pilersimasunut diskontotut aalajangersarneqarsimasoq 1%-imik ilallugu.

Aappaattut erseqqissarneqarpoq erniat annertussusiat tassaasoq ukiumoortumik ernialiutivinneqartartunut takussutissaasoq. Matumuuna erseqqissarniarneqarpoq ukiumut ernialiutivinneqartartut ernialiunneqartartut procentiat qaangersimassanngikkaat.

#### *Imm. 3-mut*

Aalajangersagaq taanna ilinniartitsinerup nalaani ilinniagaqarnersiutinik pisinnaatitaaneq naapertorlugu tunniunneqartarnissaannik piumasaqaammut ataneqartillugu isigineqassaaq. Tassani aalaja-ngersarneqarpoq ilinniarnernup nalaani ernialersuineq ilinniarnernup taamaatinneqarneratigut naammassineqarneratigulluunniit ernialersuineq pillugu malittarisassat malillugit pissasoq, tassa taarsigassarsisoq malittarisassat malillugit Namminersorerullutik Oqartussanit ilinniagaqarnersiutisisinnaajunnaarpat. Siornatigut peqqussummi ilinniagaqarnersiuteqarsinnaatitaanerup annaaneqarnera ilinniagaqartup ilinniarnerni taarsigassarsiaasa ernialersorneqalernerannut pingaarutilimmik aalajangiisuusarpoq. Tamanna allaffissornikkut suliaaavoq oqimaatsorujussuaq, tassami Naalackersuisut malittarisassaq taanna malillugu ilinniagaqartut, Kalaallit Nunaanni ilinniartitseriaatsimut attuumassuteqarunnaarsimasut ilinniakkaminnik ingerlatsinerat misissuiffigajuttarmassuk.

#### *Imm. 4-mut*

Immikkut akuersissuteqartarnermi malittarisassat pisunik utoqqatsissutaasinnaasunik immikkulluunniit ittuni, soorlu ilinniagaqarnersiuteqarfusinnaajunnaarnermi, imaluunniit ilinniagaqarnersiutisisinnaajunnaarneq sivikitsuinnaappaat (qaammatit 1-2) atorneqartarnissaat eqqarsaatigineqarsinnaavoq.

#### *§ 14-imut*

Aalajangersagaq taanna innersuussutit kingunerisaannik allannguutit eqqaassanngikkaanni allan-nguuteqarnani peqqussummi atuuttumi § 12-imik ingerlatseqqinneruvoq.

*Imm. 1-imut*

Tassani aalajangersarneqarpoq ilinniagaqarneq taamaallaat pissutsit aalajangersakkami taaneqartut pissutigalugit unitsikkallarneqarpat ernialersuineq aallartinneqassanngitsoq. Pissutsit taaneqartut tamarmik pissusiupput ilinniagaqartup ilinniagaqarnersiutisiaqaannassaguni katillugit unitsitsinerinik naatsorsuinermi ilanngullugit naatsorsuunneqartussaannngitsut. Taamaalilluni pissutsit utoqqatsissutaasinnaasut pineqarput, taamaattumillu pissusissamisoortutut isigineqanngilaq unitsitsinerup taamaattup kingornatigut ilinniagaqartoq ernialersuinermik nanertuusissallugu, tassami ilinniarneq unitsinneqartutut isigineqartussaannngimmat. Unitsitsinerli ukioq ataaseq sinnerlugu sivirususeqarpat unitsitsineq taamaattoq unitsitsigallarnertut isigineqarsinnaassanngilaq, tak. imm. 2 pillugu oqaaseqaatit.

§ 13, imm. 2-mut innersuussinikkut erseqqissarneqarpoq aalajangersagaq taanna ilinniarnermik ingerlatsinermi siullermi, aamma ilinniagaqartup ilinniarneq taanna ilinniarnelrunniit ilinniagaqarnersiutisiaqarfiusinnaasoq nutaaq aallartippagu atorneqarsinnaasoq.

*Imm. 2-mut*

Aalajangersakkakkut tassuuna siunertarineqarpoq kipititsineq kipititsigallarnertut isigineqarsinnaagaluartoq piffissami killiligaannngitsumi pisinnaannngitsoq. Ataavartumik kipititsinermut ikaarsarneq ukiumut ataatsimut inissinneqarsimavoq, tassami taanna utertitsilluni akilersuineq pillugu siunnersuummi § 17, imm. 3-kkut aalajangersarneqarsimasumut naapertuuttuummat. Ataavartumik kipititsinermut ikaarsarnermi ernialersuinerup tamatuma kingunitsiannguatigut aallartinneqartarnissaa naleqquttuutinneqarpoq.

*§ 15-imut*

Aalajangersagaq taanna innersuussutit kingunerisaannik allannguutit saniatigut annikinnerusunik allannguuteqarluni peqqussummi atuuttumi § 13-imik ingerlatseqqinneruvoq.

*Imm. 1-imut 2-mullu*

Aalajangersakkani taamaallaat pineqartut tassaapput ilinniarnermi taarsigassarsiat ilinniagaqartup ilinniakkamik aallartitseqqinnginnermini imaluunniit

ilinniartitsinermik ilinniagaqarnersiutisiaqar-fiusinnaasumik nutaamik aallartitsinissani sioqqullugu taarsigassarsiarisimasai. Ilinniarnermi taarsigassarsiat tamatuma kingornatigut taarsigassarsiarineqarsimasut taamaalillutik siunnersuummi § 13, imm. 2-kkut toqqaannartumik aalajangersaavigineqarsimapput. Piffissaq ernialersuinerup allartiffissaa aalajangersakkat marluk taakku malillugit assigiippoq.

Aalajangersakkat siunertaraat ilinniagaqartut ilinniakkaminnik siusinnerusukkut unitsitaminnik aallartitseqqittut imaluunniit ilinniakkamik ilinniagaqarnersiutisiaqarfiusinnaasumik nutaamik aallartitsisut ilinniarnermik nalaani ernialersuinermit nanertugaannginnissaannik qulakkeerinninnissaq, tassami taakku ilinniarnermik nalaani siusinnerusukkut taarsigassarsiaminnik naafferartumik akilersuisinnaanissaat naatsorsuutigineqanngimmat.

§ 13, imm. 1-imi ilinniarnerup nalaani ernialersuisarnermik pingaarnertut malittarisassaq naapertorlugu erseqqissarneqarpoq ernialersuineq unitsinneqassappat piumasaqaataasoq ilinniagaqartup Namminersornerullutik Oqartussanit ilinniagaqarnersiutisiaqarnissamat piumasaqaatit sukkulluunniit aalajangersarneqartut eqqortissimassagai. Taamaaliornikkut ernialersuiunnaartoqarnissaa siunertariinnarlugu ilinniakkamik aallartitseqqittoqartannginnissaa imaluunniit ilinniakkamik nutaamik aallartitsisoqartannginnissaa qulakkeerneqarpoq.

#### *Imm. 3-mut*

Aalajangersagaq taanna § 13, imm. 2-mi pingaarnertut malittarisassamik erseqqissaanerinnaavoq.

#### *Imm. 4-mut*

Immikkut akuersissuteqartarnermik aalajangersakkap sivikinnerusumik kipititsinerni, qaammatit 1-2, atorineqartarnissaa eqqarsaatigineqarsinnaavoq.

### *§ 16-imut*

Aalajangersagaq taanna allannguuteqarnani peqqussummi atuuttumi § 14-imik ingerlatseqqinneruvoq.

Aalajangersakkap taassuma ilinniagaqarnermi taarsigassarsisut tamakkiisumik ilaannakortumilluunniit ernialersuiffigineqannginnissaannik aamma ernialinneqareersut isumakkeerneqarnissaa nalunaaruteqarsinnaanerannut Naalackersuisut inatsisitigut tunngavissalerneqarnissaat siunertaraa.

"Tamakkiisumik ilaannakortumilluunniit ernialersuinermik" oqarnermi siunertarineqarpoq ernialersuinerup tamakkiisumik unitsinneqarsinnaanera,

imaluunniit ernialersuinerup malittarisassat atuuttut malillugit ernialersuinermit taarsigassarsisumut oqinnerusumik ernialersuinermit aalajangersaasinnaaneq. Aammattaaq ernialersuinerup piffissamut killilikkamut killiligaanngitsumulluunniit atuussinnaanera siunertarineqarpoq.

Ernialiunneqareersimasut tamakkiisumik ilaannakortumilluunniit isumakkeerneqarnerat pisinnaasoq erseqqissassallugu naleqquttuutinneqarpoq. Tamatuma ilaatigut ernialersuinerup assersuutigalugu ukiup aallartinneranit sunniuteqalersillugu unitsinneqarsinnaanera periarfissaqalersissavaa, tamannalu allaffissornikkut pissutsinit isigalugu kissaatiginartuusimavoq.

Aammattaaq ernialersuiunnaarnerup isumakkeerrinnerulluunniit allakkatigut nalunaarutigineqartarnissaa naleqquttuutinneqarpoq, taamaalilluni taarsigassarsisoq tamanna naapertorlugu aaqqissuussinissaminut periarfissaqalersillugu. Nalunaarummit, tamanna ajornanngippat, immikkut akuersinermut tungavisoq, tamatumalu annertussusia sivirususialu takuneqarsinnaasariaqarput.

"Pissutsit immikkut ittut tamanna ajornartinnngippassuk"-p atorneqarnerani Naalakkersuisut sinaakkutaqarnikkut periarfissaqarluartinneqarnissaat siunertaavoq. Taamatut ilusiliinermi ilaatigut allaffissornermut tunngasut taamaaliornissamut pissutissaqalersitsisut eqqarsaatigineqarput. Taakku assersuutigalugu tassaasinnaapput allaffissornermi teknikkikkut pissutsit tunngavigalugit malittarisassat atuuttut malillugit ernianik naatsorsuisinnaannginnerit.

### *§ 17-imut*

Aalajangersagaq taanna allannguuteqarnani peqqussummi atuuttumi § 15-imik ingerlatseqqinneruvoq.

#### *Imm. 1-imut*

Aalajangersakkami taaneqarpoq ilinniarnarup naammassinera taamatinneraluunniit eqqarsaatigalugit ilinniarnermi taarsigassarsiat utertillugit akilersornerat kingusinnerpaamik qaqugu aallartissanersoq.

Taarsigassarsisup suli ilinniakkaminik ingerlatsisilluni ilinniarnermi taarsigassarsiaminik utertilluni akilersuinini aallartissallugu kissaatigippagu tamanna periarfissaqarpoq, tamanna aamma atuuppoq taarsigassarsisup aningaasat akiligassat tamaasa ataatsikkut akilerusullugit kissaateqarpat.

#### *Imm. 2-mut*

§ 17, imm. 1-mi pineqanngitsut aalajangersakkap erseqqissarpai.

### *Imm. 3-mut*

Aalajangersarneqarpoq utertitsilluni akilersuisussaataaneq ingerlaannartumik aallartinneq ajortoq, aatsaalli tamatuminnga Naalakkersuisut piumasaqarnerisa kingornatigut pisartoq. Tamatumunnga tunuliaqutaasoq tassaavoq unitsitsigallarnerup unitsitsigallarnertut isigineqaannarsinnaanerata imaluunniit ataavartumik unitsitsinerup pineqarnerata Naalakkersuisunit aalangiivigineqarnissaa pissusissamisoortutut isigineqarmat. Pineqartoq siulleq pineqarpat taamaalilluni ilinniagaqartup taarsigassarsianik utertitsilluni akilersueqqunissaa naleqquttuunaviangilaq.

"Unitsitsigallarneq" atorneqarpoq ilinniagaqarnerup ingerlaqqittussap unitsinneqarnera pineqartoq oqaatiginarlugu.

### *Imm. 4-mut*

Aalajangersakkamut tunuliaqutaasoq tassaavoq ilinniagaq aallarteqqinneqarpat imaluunniit ilinniagaq ilinniagaqarnersiutisiaqarfiusinnaasoq nutaaq aallartinneqarpat ilinniagaqartup taarsigassarsia-minik utertitsilluni akiliisinaanissaata naatsorsuutigineqannginnera, taamaattumillu utertitsilluni akiliisussaataaneq unitsikkallarneqartariaqarluni.

Utertitsilluni akiilisussaataanerup unitsikkallarneqarneranut tunngavittut ilinniagaqartup ilinniagaqarnersiutisisinnaassagaanni piumasaqaatinik eqqortitsinissaanik piumasaqaammut tunuliaqutaasoq eqqarsaatigalugu siunnersuummi § 13, imm. 1 pillugu oqaaseqaatit innersuussutigineqarput.

Utertitsilluni akiliisussaataanerup piffissaq atuutileqqiffissaa eqqarsaatigalugu taamaallaat pineqartut tassaapput siusinnerusukkut taarsigassarsiarineqarsimasut. Ilinniarnarup aallarteqqinneqarne-rata kingornatigut imaluunniit ilinniarnarup ilinniarnersiutisiaqarfiusinnaasup nutaap aallartinnerata kingornatigut taarsigassarsiat taamaalillutik siunnersuummi § 17, imm. 1-ikkut toqqaannartumik aalajangersaavigineqarsimasussaapput.

### *§ 18-imut*

Aalajangersagaq taanna innersuussutit kingunerisaannik allannguutit eqqaassanngikkaanni allan-nguuteqarnani peqqussummi atuuttumi § 16-imik ingerlatseqqinneruvoq.

### *Imm. 1-imut*

Aalajangersakkap tunuliaqutaa tassaavoq ilinniagaqarnermi taarsigassarsiarineqarsimasut akilersorneqarneranni pingaarnerusutigut sinaakkutassanik aalajangersaasoqarnissaata naleqquttutut isigineqarnera.

Ilinniarnermi piffissap taarsigassarsiat utertillugit akilersorneqarfissaata sivisunerpaaffissaa tassani aalajangersarneqarpoq. Sivisunerpaamik ukiuni 15-ini akilersuinikkut naatsorsuutigineqarpoq taarsigassarsisut periarfissaqassasut ilinniarnermi taarsigassarsiat oqinnerungaatsiartunik atugassaqaqtitaalluni akilersornissaannut. Naafferartumik qaammammut akiliutit ikinnerpaamik 500,00 kr.-iunissaannik piumasaqaateqarnikkut taarsigassarsiat ilaasa piffissaq akilersorneqarfiat sivisunerpaamik akilersuiffissamit sivikinnerusussaavoq. Taamatut atuutitsinnginnissamik aalajangersakkap taassuma tunuliaqutaa tassaavoq sivisunerpaamik akilersuiffissaq pissutigalugu akilersuinermik aaqqissuussinerit taarsigassarsisup nalinginnaasumik akilersinnaasaatut naatsorsuutigineqartunit ikinnerusunik akilersuisalinnginnissaata qulakkeerneqarnissaa. Taarsigassarsisup qaammammut ikinnerpaamik 500,00 kr.-t akilersinnaanngippagit imm. 5 malillugu immikkut akuersissuteqarnissamut periarfissaqartussaavoq.

Taarsigassarsisup ilinniarnermi akiligassat tamakkerlugit ataatsikkut akilernissaat toqqarsinnaavaa.

#### *Imm. 2-mut*

Aalajangersakkap tunuliaqutaa tassaavoq piffissaq sivisunerpaamik akilersuiffissaq taamaattoqan-ngippat sivikillisinneqassasoq, tamannalu naleqquttutut isigineqanngilaq, utertitsilluni akilersuisus-saatitaaneq unitsikkallarneqarsimappat.

#### *Imm. 3-mut*

Aalajangersakkakkut tassuuna ilinniagaqartoq akilersuinissamik Naalakkersuisunut nammineq isumaqatigiissuteqarnissaminut pisussaaffilerneqarpoq. Isumaqatigiissut utertitsilluni akilersuisussaataanerup aallartinnginnerani isumaqatigiissutigineqareersimassaaq, tassami utertitsilluni akilersuisussaataaneq tamatuma nalaani aallartittussaammat.

#### *Imm. 4-mut*

Aalajangersakkap Naalakkersuisut pisussaaffilerpai ilaatigut taarsigassaarsisoq qinnuigissagaat akilersuinissaq pillugu isumaqatigiissuteqaqqullugu kiisalu akilersuinissamut malittarisassanik aalajangersaassasut, ilaatigullu taarsigassarsisoq isumaqatigiissuteqarumanngippat isumaqatigiissummik aalajangersaanissamut.

#### *Imm. 5-imut*



Aalajangersakkap imm. 1-imi malittarisassat atuutsinneqannginnissaannik, aamma akiligassat akilerneqartussanngorsimasut akilerneqarnissaasa kinguartinneqarnissaannut, Naalackersuisut immikkut akuersissuteqarnissaannut periarfissippai. Ukiuni 15-imi sivisunerpaamik akilersuinissap saneqqunneqarsinnaannginnera oqaaseqaatigiit kingulliit aalajangersarpaat.

#### *§ 19-imit*

Aalajangersagaq taanna allannguuteqarnani peqqussummi atuuttumi § 17-imi ingerlatseqqinneruvoq.

Akilersuinissamik isumaqatigiissutip akilersuinissamilluunniit aalajangersakkap unioqqutinneqarnera sunik kinguneqassasoq tassani aalajangersarneqarpoq. "Annaasassaajunnaarlugit akiliisitsineq"-mik oqarnermi isumagineqartoq tassaavoq akiligassaqaqfigineqartoq akilersuinerup unitsinneqarneranut atatillugu aamma akiitsunik akiliisitsiniarnermut atatillugu aningaasartuutitigut annaasaqassanngitsoq.

Akiitsut tamaasa akilerneqartussanngortillugit akilersorneqarnerat unitsinneqarpat, utertitsilluni akilersuineq tamanna pillugu peqqussummi malittarisassatigut siunissami maleruagassaqaqartitaajunnaassaaq.

#### *§ 20-mut*

Aalajangersagaq taanna allannguuteqarnani peqqussummi atuuttumi § 18-imi ingerlatseqqinneruvoq.

Piginnaatitsinermik aalajangersagaq naafferartumik akilersuutit akilerneqartut ernianut taarsigassarsiallu tunngaviusumik aningaasartaannut agguataarneqarnerat pillugu malittarisassanik aalajangersaanermi atorneqassasoq ilaatigut eqqarsaatigineqarpoq.

#### *§ 21-mut*

Aalajangersagaq taanna allannguuteqarnani peqqussummi atuuttumi § 19-imi ingerlatseqqinneruvoq.

#### *Imm. 1-imit*

Ilinniagaqarnersiutit peqquserlulluni tiguneqarsimasut pillugit aalajangersakkami pineqarpoq pisoqarsinnaasoq Naalackersuisut kukkussuteqartoqarneratigut ilinniagaqarnersiutinik amerlanaakkanik tunisinerisigut, tiguisullu aningaasat taakku

kukkunikkut tunniunneqarsimanerat ilisimassagaa naatsorsuutigineqarluni. Pisuni taamaattuni utertitsilluni akilersuinermi, soorlu tamanna imm. 1-imi aamma oqaatigineqartoq, inatsiseqartitsinermi tunngaviit nalinginnaasut malinneqassapput, taamaattorli tamatuma peqqussutikkut erseqqissarneqarnissaa naleqquttutut isigineqarsimavoq, taamaalillutik taamatut tiguisut tamanna tamakkiisumik ilisimareerniassammassuk.

Tassunga atatillugu "peqquserlulluni"-mik oqarnermi pineqarpoq aningaasat tunniunneqartut tunngavissaqanngitsumik tiguneqarnerat tiguisup ilisimasimagaa ilisimasariaqaraaluunniit.

#### *Imm. 2-mut*

Ilinniagaqarnersiutit tiguisup eqqunngitsunik amigartuniluunniit paasissutissiineq pissutigalugu tigusimasaasa piffissaq ernialersorneqalerfissaat tassani aalajangersarneqarpoq. Aningaasat tigusimasami tunngavissaqanngitsumik tighunerat tiguisup piffissap tiguisiffiusup nalaani tamakkiisumik ilisimariissammagu piffissamit tiguisiffiusumit ernialersuisoqalertarnissaa siunnersuutigineqarpoq.

#### *Imm. 3-mut*

Aalajangersakkami tassani pisut tiguisup nammineq pisuussuutiginnisaanik tunniussisoqarfiusut pineqarput. Piffissaq peqquserlulluni tiguisiffiusoq piffissap ilinniagaqarnersiutinik tiguisiffiusup tamatigut assigisarnaviannigilaa, imaluunniit pissutsit assigiinngitsut patsisigalugit ilinniagaqarnersiutit eqqunngitsumik tiguneqarsimappata, tassami tiguisup pisuni aalajangersimasuni aningaasat tiguisimallugit aatsaat kingusinnerusukkut ilisimalertartussaammagu. Taamaattumik piffissaq ernialersuilerfiulersussaq eqqarsaatigalugu piffissaq tiguisiffiusoq pingaarnerpaajunngilaq, piffissarli ilinniagaqarnersiutinik tiguisassarinagit tiguisup ilisimannilerfia pingaarnerpaajulluni. Kisianni piffissaq tiguisiffiusoq tassunga naapertuuttusoq amerlanertigut naatsorsuutigineqareersimasinnaasussaavoq.

Tassunga atatillugu "peqquserlulluni"-mik oqarnermi pineqarpoq aningaasat tunniunneqartut tunngavissaqanngitsumik tiguneqarnerat tiguisup ilisimasimagaa ilisimasariaqaraluaaluunniit.

#### *Imm. 4-mut*

Tassani ilinniagaqarnersiutit peqquserlulluni tiguneqartut qanoq ernialersorneqarnissaat aalajangersarneqarpoq. Ernialersuinermi annertussuseq suna atorneqassasoq aalajangersarneqarpoq.

Aammattaaq aalajangersarneqarpoq aningaasat ernialersorneqartussat tassaammata piffissami sukkulluunniit akiligassanngorsimasut.

### § 22-mut

Aalajangersagaq taanna allannguuteqarnani peqqussummi atuuttumi § 20-mik ingerlatseqqinneruvoq.

Ilinniagaqarnersiutit tunngavissaqarnani tiguneqartut ilinniarnermi taarsigassarsianut allangortinneqarsinnaanerannik aalajangersagaq isumaqarpoq Naalakkersuisut illuatungiusumik oqaloqateqaqqaarnatik ilinniagaqarnersiutinik taarsigassarsiannngortitsisinnaasut. Tamatuma tunuliaqutaa tassaavoq tigusanik tigusussaanagit peqquserlunnani tigusisup tigusani atoreersimagajuttartussaa-gai, taamalu aningaasat amerlanaarlugit tigusani ingerlaannaq akilersinnaanagit. Taamaattumik ilinniagaqarnersiutit taamaattut ilinniarnermi taarsigassarsiatut suliarineqarnissaat naleqquttutut isigineqarpoq, tamatumalu nassataralugu aningaasat taakku aatsaat ilinniarnep kipitinneqarnerata imaluunniit naammassineqarnerata kingornatigut ernialersorneqalissasut, taakkulu utertillugit akilersorneqarnerat kipititsinerup naammassinninnerullu kingornatigut tullerinneri malillugit aatsaat qaammatit pingasut imaluunniit ukiup ataatsip qaangiunneratigut aallaartissasoq, tak. aamma siunnersuummi § 13, imm. 2 aamma § 17, imm. 1.

Tassunga atatillugu "tigussaanagit peqquserlunnani tigusineq"-mik oqarnermi pineqarpoq tigusisut aningaasat tiguneqartut tunngavissaqarnani tiguneqarnerat ilisimasimangikkaat ilisimasimasinnaasariaqanngikkaalluunniit.

### § 23-mut

Aalajangersagaq taanna allannguuteqarnani peqqussummi atuuttumi § 21-mik ingerlatseqqinneruvoq.

Piginnaatitsinermik aalajangersagaq ilaatigut ilinniagaqarnersiutit tunngavissaqanngitsumik tiguneqartut akilersorneqarnerat pillugu malittarisassanik aalajangersaanermi atorneqassasoq eqqarsaatigineqarpoq.

### § 24-mut

Aalajangersagaq taanna allannguuteqarnani peqqussummi atuuttumi § 22-mik ingerlatseqqinneruvoq.

#### *Imm. 1-imut*

Nr. 1-imi aamma 2-mi aalajangersakkat nerisanut ineqarnermullu akiliutinut akiitsut pilertannginnissaasa qulakkeerneqarnissaat siunertaraat. Nr. 2 nutaatut

aalajangersagaavoq. Aalajangersakkap taassuma tunuliaqutaraa pisoqartarmat ilinniartut ineqarfiini ineqarfinnilu allani Namminersornerullutik Oqartussat kommunilluunniit piginnngisaanni nerisaqarnermut ineqarnermullu Namminersornerullutik Oqartussat akiliisarmata. Tamanna ilinniartut ineqarfii ineqarfiillu allat Danmarkimiittut nunanilu allaniittut eqqarsaatigalugit atuuppoq. Nr. 2-mut naapertuuttumik "ineqarfiillu allat" ilan-ngunneqarsimavoq, ilinniartut ineqarfippiaannaat kisimik pineqanngitsut erseqqissarniarlugu.

Nr. 3-mi aalajangersagaq ilinniagaqartut kattuffiitut kiffartuussinertut isigineqassaaq. Aalajangersagaq taanna imm. 3-mut atatinneqassaaq, imm. 3-mimi aalajangersarneqarmat ilinniagaqartoq kattuffimmut ilaasortaajunnaarpat ilinniagaqartut kattuffii tamanna pillugu allakkatigut ingerlaannartumik Naalakkersuisunut ilisimatitsisassasut.

#### *Imm. 2-mut*

Aalajangersagaq nutaajuvoq, taamaallaallu ilinniagaqartup piffissami akiliutitaqanngitsumik nerisaqartinneqarfianut ineqartiinneqarfianullu ilinniagaqarnersiutinit unerartitsisoqarsinnaanerata aalajangersarneqarnissaanik tunngaveqarlluni. Tamatuma manna tikillugu periaasiusoq naapertorlugu piffissami ilinniagaqartup neqeroorummik atuinngiffigisaraluani aamma unerartitsisoqarsinnaanera aamma nassataraa.

#### *Imm. 3-mut*

Aalajangersagaq taanna allannguuteqarnani peqqussummi atuuttumi § 22, imm. 3-mik ingerlatseqqinneruvoq.

### *§ 25-mut*

Aalajangersagaq taanna allannguuteqarnani peqqussummi atuuttumi § 23-mik ingerlatseqqinneruvoq.

Unerartitsineq ilanngaassuinerlu pillugit isumaqatigiissutitigut ilinniagaqarnersiutit qanoq annertutigisumik pinngitsaaliinikkut akiliisitsiniutigineqarsinnaaneranni namminerlu piumassuseq tunngavigalugu isumaqatigiissutigineqarsinnaaneranni sinaakkutassanik aalajangersaaniarneq aalajangersakkap siunertaraa.

Imm. 1-imi aalajangersarneqarpoq ilinniagaqarnersiutitigut pisassarisat qularnaveeqqutitut arsaarinnissutigineqarsinnaanngitsut, imaluunniit eqqartuussivikkut allatut malersorneqaataasinnaanngitsut.

Imm. 2-mi aalajangersarneqarpoq ilinniagaqarnersiutinit unerartitsisoqarnissaa pillugu ilinniagaqartup nammineq piumassutsini malillugu isumaqatigiissutaanik

malinninnissamat Naalakkersuisut qanoq annertutigisumik pisussaaffeqartut. Aalajangersakkamili ilinniagaqarnermi akiitsut akilerneqartussanngorsimasut pillugit ilinniagaqarnerisutit unerartitsinissaq pillugu ilinniagaqartunut Naalakkersuisut namminneq isumaqatigiissuteqarsinnaanerat pineqanngilaq. Taamaattumik ilinniagaqartoq isumaqatigiissuteqarfigereerlugu ilinniagaqarnerisutit 500,00 kr-nit amerlanerusut Naalakkersuisut unerartissinnaasussaavaat.

Aalajangersakkami siunertarineqarpoq ilinniagaqarnerisutit siunertaminnut - tassalu ilinniagaqarnerup nalaani inuuniarnermut aningaasartuutit naapertuuttut akilerneqarnissaasa qulakkeerneqarnissaannut - sapinngisamik annertunerpaamik atornerneqarnissaasa qulakkeerneqarnissaat. Tamanna pissutigalugu qularnaveeqqutitut arsaarinnittoqarnissaa eqqartuussivikkullu allatigut malersuisoqarnissaa imm. 1-imi inerteqqutigineqarpoq. Ilinniagaqartoq nammineq ilinniagaqarnerisutit tamakkiisunit ikinnerusut atorlugit ingerlasinnaalluni naliliippat unerartitsinissamik nammineq piunassuseq tunngavigalugu isumaqatigiissutinut taamaattunut illersuuteqarnissaq aallaavittut pisariaqartussaannngilaq. Ilinniagaqartorli imminut artorsilluni pisussaaffilertoorsinnaavoq, tamannalu tunngavigalugu Ilinniagaqarnerisutit Ingerlatsiviup malissallugu pisussaaffigisaanik qaammammut 500,00 kr.-t amerlanerpaaffissanngortinneqarsimapput.

Naalakkersuisut unerartitsinissamik isumaqatigiissuteqarneranni amerlanerpaaffissaliussanik atuuttoqanngikkaluartoq qaammammut 500,00 kr.-t sinnerlugit unerartitsisoqarnissaa aatsaat isumaqatigiissutigineqarsinnaasariaqarpoq, ilinniagaqartoq isumaqatigiissummik taamaattumik malinninnermigut aningaasaqarnikkut ingerlasinnaasoq qularnaateqanngippat.

#### *§ 26-mut*

Aalajangersagaq taanna allannguuteqarnani peqqussummi atuuttumi § 24-mik ingerlatseqqinneruvoq.

Pisuni taamaattuni ilanngaassinissamat periarfissaqarneq illersuineri isiginiagassanut § 25 pillugu oqaaseqaatini taaneqartunut tunngaviummik akerliusutut isigineqanngilaq, taamaalillunilu pinngitsaaliilluni akiliisitsiniutip sunniuteqarluartup taassuma Naalakkersuisunit atornerqarsinnaanera naleqquttut isigineqarpoq.

#### *§ 27-mut*

Aalajangersagaq taanna peqqussummi atuuttumi § 25-mik tunngaveqarpoq.

*Imm. 1-imut*

Aalajangersakkami aalajangersarneqarpoq ilinniagaqarnersiutit pillugit malittarisassat Naalakkersuisunit aallaavittut aquneqassasut, taannalu Namminersornerullutik Oqartussat ataanni ingerlatsivittut immikkoortortaavoq. Naalakkersuisut Ilinniagaqarnersiuteqartitsivik, Namminersornerullutik Oqartussat ingerlatsivittut immikkoortortaat, Namminersornerullutik Oqartussanut ingerlatassan-ngortippaat. Nutaatut imm. 2-mi Naalakkersuisut periarfissinneqarput aammattaaq ilinniagaqarnersiuteqartitsinermut malittarisassat tamakkerlutik ilaannakorlutilluunniit allaffissornikkut aquneqarnerat oqartussaaffeqarfinnut sullissiveqarfinnullu allanut Namminersornerullutik Oqartussat ataanniittunut suliaassanngortinnissaannut. Taamaattumik imm. 1-imi periarfissat taakkua marluk innersuunneqarput, imm. 2 aamma imm. 3-mi allaaserineqartut taaneqartup saneqqunnissaanut naammattumik tunngavissaqartutut isigineqarpoq.

### *Imm. 2-mut*

Ilinniagaqarnersiutit pillugit malittarisassanik aqutsinerup Namminersornerullutik Oqartussat ataanni oqartussanut suliffeqarfinnullu allanut aamma tunniunneqarsinnaaneranut inatsisitigut erseqqissumik tunngavissaqarnissamik kissaateqarneq aalajangersakkap tunuliaqutaraa. Ilinniagaqarnersiutit pillugit malittarisassanik aqutsineq ullumikkut Ilinniagaqarnersiuteqartitsivimmu, Kultureqarnermut, Ilinniartitaanermut, Ilisimatusarnermut Pisortaqarfimmu, Kalaallit Nunaanni ilinniarfinnut, Grønlandsbankenimut aamma Danmarkimi Kalaallit Illuutaannut suliaassanngortitaavoq. Taamaalilluni manna tikillugu periaasiusup inatsiseqartitsinikkut aqqqissuussaasumik aalajangersaavigineqarnissaa aamma kissaatigineqarpoq.

### *Imm. 3-mut*

Aalajangersagaq taanna allannguuteqarnani peqqussummi atuuttumi § 25, imm. 1-imi oqaaseqatigiinnik kingullernik ingerlatseqqinneruvoq.

Ilinniagaqarnersiutit pillugit malittarisassanik aqutsinerup tamarmi taassumaluunniit ilaat asuliffeqarfimmu namminersortumut tunniunneqarnissaa, imaluunniit aqutsinerit ilaasa aalajangersimasut, assersuutigalugu ilinniarnermi taarsigassarsiat aquneqarnerisa, ilinniagaqarnersiutinik tunniussisarnerup imaluunniit pisassarisanik akiliisitsiniarnerup ilaasa kisimik tunniunneqarnissaat periarfissaqalissasoq aalajangersakkap siunertaraa.

Massakkut ilinniagaqarnersiutit pillugit malittarisassanik aqutsinerup ilai Grønlandsbankenimut, taarsigassarsianik aqutsineq aqutsinerillu ilai Kalaallit Illuutaannut imminnut pigisutut suliffeqarfiumunut tunniunneqarsimapput.

Allakkatigut isumaqatigiissutip pigineqarnissaanik piunasaqaat ilanngunneqarsimavoq isumaqatigiissutip annertussusia, atugassarititaasut piunasaqaatillu annertussusiat sapinngisamik annertunerpaamik erseqqissuutikkumallugu.

*Imm. 4-mut*

Aalajangersagaq taanna allannguuteqarnani peqqussummi atuuttumi § 25, imm. 2-mik ingerlatseqqinneruvoq.

*Imm. 5-imut*

Aalajangersagaq taanna allannguuteqarnani peqqussummi atuuttumi § 25, imm. 3-mik ingerlatseqqinneruvoq.

Ilinniagaqarnersiutisiaqartup Kalaallit Nunaanni Danmarkimiluunniit aningaaserivimmi kontumik pineqartup ilinniagaqarnersiutaasa nakkarfissaannik innersuussinissamik pisussaaffilerneqarnissaa aalajangersakkami siunertarineqarpoq. Tamatumani ilinniagaqarnersiutit tunniunneqartarnerannik aqutsinerup oqilisarneqarnissaa siunertarineqarpoq, matumani ilinniagaqartut Kalaallit Nunaata Danmarkilluunniit avataaniittut eqqarsaatiginerullugit. Naliliilluni isumaqartoqarpoq ilinniagaqartut taakku ilinniagaqarnersiutit Kalaallit Nunaanni Danmarkimiluunniit aningaaserivik aqqutigalugu nunami najugaqarfigisaminni aningaaserivimmut annertunerusumik ajornartorsiutitaqanngitsumik nuutsissinnaagaat. Aammattaaq suliffeqarfimmut namminersortumut taarsigassarsiat aqunneqarnerat pillugu isumaqatigiissuteqarnissami tunngavittut pisariaqarsinnaavoq taarsigassarsisup Kalaallit Nunaanni Danmarkimiluunniit aningaaserivimmi kontoqarnissaa.

*§ 28-mut*

Aalajangersagaq nutaajuvoq.

*Imm. 1-imut*

Aalajangersakkap tunuliaqutaa siunertaalu eqqarsatigalugit nalinginnaasumik oqaaseqaatit innersuussutigineqarput.

Aalajangersagaq § 27, imm. 3-mut innersuussivoq, ilinniagaqarnersiutit pillugit malittarisassat aqunneqarnerisa tamakkiisumik ilaannakortumilluunniit tunniunneqarsimasinnaanerit sillimmaanniarlugu. Innersuussutikkut taassuuna oqartussaasup il.il. kialuunniit ilinniagaqarnersiutit pillugit malittarisassat aqunneqarneranni atugassatut paasissutissat pissarsiariniarsinnaassagai ingerlateqqissinnaassagaalu qulakkeerreqarpoq.

Paasissutissanik ilinniagaqarnersiutit pillugit malittarisassat aqunneqarnerannut pingaaruteqartunik aqutsinermi oqartussaasunut il.il. ingerlatseqqittoqarsinnaavoq. Oqartussaasunut allanut il.il. ingerlatseqqittoqarsinnaanera ingerlatsineq pillugu

inatsiseqartitsinermi tamanna pillugu malittarisassat malillugit aalajangiiffigineqartassaaq.

Paasissutissat ilinniagaqarnersiutit pillugit malittarisassanut pingaaruteqartut assersuutigalugu tassaapput soraarummeernerni karakterit, siusinnerusukkut ilinniagaqarnerup ingerlasimanera, kontonormut ilinniagaqarnersiutitik ikisiffissat, ateq, najugaq aamma inuttut normu pillugit paasissutissat. Paasissutissat suliamik suliarinninnerup aalajangersimasup suliarineqarnerani atugassat pissarsiarinarneqarsinnaasussaallutillu ingerlateqqinneqarsinnaasussaapput.

Aammattaaq Kalaallit Nunaanni nunaniluunniit avannarlerni innuttaasunut ilinniagaqarnersiutitik tunniussineq pillugu paasissutissanik taakku piffissami taannaasumi Kalaallit Nunaannit nunallu avannarliit ilaannit ilinniagaqarnersiutitik ataatsikkut tiguisannginnerannik nakkutilliinermi pi-ngaaruteqartut atugassanik ingerlatitseqqissinnaanermut inatsisitigut erseqqissumik tunngavissaliisoqarnissaa naleqquttutut isigineqarpoq. Pingaartumik ilinniagaqarnersiutit qanoq amerlatigisut tunniunneqarsimanerat, ilinniagaqarnersiutit suut tunniunneqarsimanerat piffissamullu sumut tunniussisoqarsinera pillugu paasissutissat pineqartussaapput.

Sulisussarsiornermi atugassatut paasissutissanik ingerlatitseqqissinnaanermut inatsisitigut immikkut tunngavissaliiniarnermut Kalaallit Nunaanni oqartussaasut suliffeqarfiillu kalaallinut ilinniagaqartunut atorfinitsitsiviusinnaasut pillugit ussasaarinerminni nunap isorartunerujuussua pissutigalugu Danmarkimi oqartussaasunut sanilliullutik annertunerujussuarnik ajornartorsiuteqarnerat pissutaavoq. Paasissutissanik taamaattunik ingerlatitseqqinneq ilinniagaqartut ataasiakkaat akuersinerisigut pisinnaasussaavoq. Tamanna pisortani oqartussaasut nalunaarsuiffii pillugi inatsimmi nr. 294-imi 8. juni 1978-imeersumi § 16-imut naapertuuppoq.

### *Imm. 2-mut*

Imm. 2-mi aalajangersagaq tunngavigalugu malittarisassanik paasissutissat pissarsiarineqartut siunertamut taaneqartumut atorneqarnermik saniatigut siunertanut allanut atoneqartannginnissaannik qulakkeerisunik aalajangersaasoqassasoq siunertarineqarpoq.

### *§ 29-mut*

Aalajangersagaq taanna allannguuteqarnani peqqussummi atuuttumi § 25 a-mik ingerlatseqqinneruvoq. Taamaattorli 2000-imi aningaasanut inatsimmi aningaasat amerlassusii pillugit paasissutissaq ilanngunneqarsimangilaq.

Akiligassat akilerneqartussanngorsimasut pillugit nukingisaarinermut akiliutitik taarsigassarsisumut akiliisitsiniarnissamut Naalakkersuisut periarfissalernerneqarnissaat aalajangersakkap siunertaraa. Aningaasartuutit taamaaliornikkut



piffissaagallartillugu akiliisimanngitsup akisussaaffigissavai. Nukingisaarinermi akiliutit taarsigassarsiat ingerlaannaq akiligassanngortillugit atorunnaarsinneqarsimasut naafferartumik akilersorneqarneranni aamma ilinniagaqarnersiutit amerlanaarlugit tunniun-neqarsimasut utertillugit akilerneqarnerini akiliutigeqquneqarsinnaasussaapput.

Akiliutit aningaasartaasa amerlassusiat aningaasanut inatsisikkut ukiut tamaasa aalajangersarneqartassaaq, taamaaliornikkullu akiliutit aningaasartaasa amerlassusiisa akit allanngorarnerat peqatigalugu aalajangersarneqartarnissaannut periarfissaqalissaaq.

Akiligassat akilerneqartussanngorsimasut taakkuusut pillugit nukingisaarinermut amerlanerpaamik pingasoriarluni akiliisitsisoqartarnissaanik aalajangersakkap akiligassat akilerneqarsimanngitsut taakkuusut pillugit akiliutit tamarmiusut qummut killissalernerneqarnissaat siunertaraa. Tamatumunnga peqatigitillugu "akiligassat akilerneqartussanngorsimasut"-nik atuinikkut erseqqissarneqarpoq ilinniagaqartup akiligassat akilerneqartussanngorsimasut allat tullianik piffissaagallartillugu akilinnippagit nukingisaarinermut akiliutit pingasoriarluni akilersinniaqqinneqarsinnaasut.

Periaaseq atuuttoq malillugu piunasaqaat nukingisaaraluni pingasoriarluni allagaqareernikkut eqqartuussivikkoortumik akilersinniagassanngortinneqassaaq.

Nukingisaarinermut akiliutitigut isertitat Nunatta Karsianut nakkartinneqartassapput. Taarsigassarsisitsisarnermik aqutsineq suliffeqarfimmit namminersortumit tiguneqarpat nukingisaarinermi akiliutit suliffeqarfiup taassuma Naalakkersuisut sinnerlugit akilersinniarsinnaasussaavai.

### *§ 30-mut*

Aalajangersakkap taassuma peqqussummi atuuttumi § 26 taarserpaa.

#### *Imm. 1-imut*

Tassani aalajangersarneqarpoq ilinniagaqarnersiutinik tunniussineq pillugu aalajangiinerit ullormit aalajangiiffiusumit sapaatit akunneri arfinillit qaangiutsinnagit Naalakkersuisunut naammagit-taalliuutigineqarsinnaasut. Naammagittaalliuutit manna tikillugu Ilinniagaqarnersiutisiaqartitsinermi Naammagittaalliuuteqartarfimmut suliasanngortinneqarsinnaasarsimapput, taannali atorunnaarsinneqassasoq matumuuna siunnersuutigineqarpoq.

Taamatutaaq piffissaliussaq allanngortinneqarpoq, taamaalilluni piffissaliussaq massakut aalaja-ngiinerup tiguneranit sapaatit akunnerinik sisamanik sivissuseqaraluortoq siunissami sapaatit akunnerinik arfinilinnik sivissuseqalissalluni.

Malugeqquneqarpoq naammagittaalliuteqarnissamut piffissaliusseq sapaatit akunnerinit sisamaniit sapaatit akunnerinut arfinilinnut sivitsorneqarmat, kiisalu piffissaliusseq maanna aalajangiinerup ulluaniit naatsorsuunneqalerluni, siullermik aalajangiinerup tiguneraniit naatsorsuunneqaraluarluni. Allanguut pivog aalajangiineq qanga tiguneqarsimanersoq ajornakusoorsinnaammat, aalajangiineq allakkatigut tammatsaalisatigut nassiunneqarsimanngippat. Periaaserli tamanna taammaattoq allaffissornikkut assut suliakkersuutaasutut isigineqarpoq aammalu allakkat nassiunnerinut immikkut annertuumik aningaasartuutaasussaalluni. Naammagittaalliuut piffissap naammagittaalliuteqarfiusussap qaangiunnerani tunniunneqarpat, kingunerisinnaavaa naammagittaalliuutip suliarineqannginnera.

Allanguutip tunuliaqutaa eqqarsaatigalugu nalinginnaasumik oqaaseqaatit innersuussutigineqarput.

Aalajangersakkap ilinniagaqarnersiutinik tunniussinernik naammagittaalliuutit suliarineqarneranni inuinaat peqataasarunnaarneranik nassataqarpoq. Aammattaq atuuffiata siusinnerusukkumut sanilliullugu annertusinera aalajangersakkap nassataraa, tassami immikkut akuersissuteqarneq pillugu aalajangiinerit manna tikillugu naammagittaalliuutigineqarsinnaasimanngimmata, massakkulli taamaakkunnaarluni.

#### *Imm. 2-mut*

Immikkut akuersissuteqarnissamik aalajangersagaq ilanngunneqarpoq ilinniagaqartut inatsiseqarnikkut inissisimanagerat pitsaannginnerulersikkumanagu. Imatut pisoqarsinnaavoq, pisariaqarani ilinniagaqartup piffissaq naammagittaalliuuteqarfiususseq qaangiutsinnagu aalajangiineq tigussagaa.

Immikkut akuersissuteqartoqarsinnaavoq ilinniagaqartup uppersarsarsinnaappagu imaluunniit uppersarsisippagu piffissaq naammagittaalliuuteqarfiususseq qaangiutsinnagu aallarsimanermini naammagittaalliuuteqarsinnaanani.

#### *Imm. 3-mut*

Naalackersuisut imm. 2-kkut naammagittaalliortarnek pillugu aalajangersakkanik aalajangersaanissaminnut suli periarfissaqarput, tamatumani naammagittaalliuutit pillugit periaaseq ilanngullugu eqqarsaatigalugu.

### *§ 31-mut*

#### *Imm. 1-imut*

Peqqussutip 1. august 2005-imi atortuulersinneqarnissaa siunnersuutigineqarpoq, tassami ukiup ilinniarfiusup nutaap allartinneranut atatillugu peqqussutip atortuulernissaa naleqquttutut isigineqarmat.

Sunniuteqalernissaanik aalajangersakkakut siunnersuutigineqartukkut peqqussutip atorineqarnera ataatsimut isigalugu pingaaruteqassaaq ilinniagaqarnersiutit piffissaq atortuulersitsivik taanna sioqqullugu kingoqqulluguluunniit tunniunneqarsimanersut.

#### *Imm. 2-mut*

§ 30-ip 1. januar 2005-imiilli atortuulernissaanik siunnersuuteqarnermut tamatumani ukiup ilinniarfiusup nutaap aallartinnerata utaqqinissaanut pissutissaqannginnera pissutaavoq. § 32, imm. 2-mut innersuussutikkut erseqqissarneqarpoq Naammagittaalliuuteqartarfiup 1. januar 2005-imi atorunnaarsinneqaraluarluni naammagittaalliuutit 1. januar 2005 sioqqullugu tunniunneqarsimasut suliarisassagai, taamalu naammagittaalliuutit taakku naammassillugit suliarineqarnissaasa tungaanut atuutissalluni.

#### *§ 32-mut*

#### *Imm. 1-imut*

Peqqussutip matuma peqqussut atuuttoq taarsermagu peqqussut atuuttoq peqqussutip nutaap atortuulerneratigut atorunnaarsinneqassasoq siunnersuutigineqarpoq, taamaattorli naammagittaalliuuteqartarneq pillugu aalajangersagaq naammagittaalliortarneq pillugu aalajangersakkap nutaap 1. januar 2005-imi atortuulernerneq peqatigalugu atorunnaarsinneqassalluni.

#### *Imm. 2-mut*

Tamatumunnga peqatigitillugu erseqqissarneqarpoq naammagittaalliuutit 1. januar 2005 nallertinnagu tunniunneqarsimasut Naammagittaalliuuteqartarfiup naammassillugit suliarisassagai.

#### *§ 33-mut*

Allaffissornikkut aalajangersakkat peqqussummi atuuttumi aamma peqqussummi siusinnerusukkut atuussimasumi aalajangersarneqartut peqqussummut matumunnga assortuuttuunngikkunik atuutiinnarnissaat aalajangersakkap nassataraa. Ilinniagaqarnersiutit pillugit nalunaarut atuuttoq aamma atuutiinnassaaq, siunertarineqarporli peqqussutip atuutilerneranut peqatigitillugu allanngortinneqassasoq.

*§ 34-mut*

Aalajangersagaq taanna malitsigisatut allanngortitsineq eqqassaangikkaanni allannguuteqarnani peqqussummi atuuttumi § 29-mik ingerlatseqqinneruvoq.

Atuutsitsinnginnissamik aalajangersakkakut tassuuna inuit, attuumassuteqarnissamik aalajangersakkat sakkukinnerunerisa nalaani ilinniartussatut tiguneqarsimasut ilinniarnersiutisiaqaannarnissaat qulakkeerneqarpoq.

*§ 35-mut*

Aalajangersagaq taanna allannguuteqarnani peqqussummi atuuttumi § 30-mik ingerlatseqqinneruvoq.

Tassani ilinniagaqarnermi taarsigassarsiat naalagaaffimmit aamma Nunatta Karsianit aningaasalersugaasut peqqussutip maannamut atuuttup atortuulersinneqarnera sioqqullugu taarsigassarsiarineqarsimasut eqqarsaatigalugit qanoq iliortoqarnissaa aalajangersarneqarpoq. Tassannga erserpoq taarsigassarsianut taakkununga peqqussummi ernialersuisarneq pillugu malittarisassat kingumoortumik sunniuteqalissanngitsut. Oqaaseqatigiinni kingullerni taarsigassarsiat 1. august 1995-ip ki-ngornatigut 1. august 1996-ilu sioqqullugu taarsigassarsiaritinneqarsimasut eqqarsaatigalugit ukiut tamaasa aningaasanut inatsisikkut erniat annertussusissaannik aalajangersaasoqartannginnissaa siunertarineqarpoq.

*§ 36-mut*

Aalajangersagaq taanna allannguuteqarnani peqqussummi atuuttumi § 31-mik ingerlatseqqinneruvoq.

Aalajangersakkami ilinniagaqarneriutit tigusassarinagit peqqussutip atuuttup atortuulersinneqan-nginnerani tiguneqarsimasut pineqarput. Tassannga erserpoq pisassarisanik taakkuninnga ernialersuineq pillugu malittarisassat atuuttut ingerlateqqinneqartullu kingumoortumik sunniuteqassan-ngitsut, pisassarisalli peqqussutip atortuulernerata kingornatigut malittarisassat atuuttut malillugit ernialersorneqassasut.

*§ 37-mut*

Aalajangersagaq taanna allannguuteqarnani peqqussummi atuuttumi § 32-mik ingerlatseqqinneruvoq. Atuutsitsinninnissamik aalajangersakkap taassuma akilersuinissamik isumaqatigiissutit peqqussutip maannamut atuuttup atortuulersinneqarnera sioqqullugu isumaqatigiissutigineqarsimasut ataqqineqarnissaat siunertaraa.